

## Ibeliu

### *Kivemala*

MeIsileli Yeisu Keliso wagaine ivetumagana ani taidei yadi leta. Biyavo-dina adiyegana anavelu 'meIbeliu', ada bonadi vona Ibeliu. Leta taidei anatovetokiluma keke kada alamane, faina keke tauna anayegana gida inana.

Badi meIbeliu tovetumagana ani tubuiyadiyavo meIbeliu tufodi keke ida vemwamwala wagaidiya faina, inuwanuwa vaita yadi oduodu tuwaina Mosesese yana veimeya wagaine ina yewadi. Taidei faina leta anatovetokiluma nuwanuwana gina vewaledi vaita Yeisu anaoduodu ani yadi oduodu anaveimeya tuwaina giveiwakasegena. Yeisu ani Banae Yaubada Natuna, ada aneloseyavo ke falofitayavo kadu Mosesese ani gitubusege-moedi. Mosesese yana veimeya anamatawalewale wagaine ani kaliva keke adifaiweya veyavovagata Yaubada nodi ina nuwaga. Aku Yeisu ani Banae yada veyavo anatovegugai aditonagona ada Yaubada aiyatagine gimiyamiya-vagata ide faideya faina, anavetumagana anawai ani oduodu anaveimeya tuwaina giveiwakasegena.

Keliso ani Yaubada anaitaita ke yana veuluva giivemogatalidi. (1:1-3)

Keliso ani Yaubada yana aneloseyavo gikai-wabusegedi. (1:4 - 2:18)

Yeisu lakai-moena muliya-yo Mosesese ada Iyosuwa. (3:1 - 4:13)

Keliso lakai-moena ayo badi veyavo anatoveg-  
ugai velugadiyavo. (4:14 - 7:28)

Veyavo anawai Keliso gikiveyegemonina ani  
veyavo anawai tuwaina giveiwakasegena.  
(8:1 - 9:28)

Keliso yana vebolavoi seya-moena  
givebolavoiyena ani vebolavoi velugadiyavo  
matatabudi giveiwakasegedi. (10:1-39)

Vetumagana faina. (11:1 - 12:29)

Lauwage tulina tulina ke vona anaebalauyabu.  
(13:1-25)

*Yaubada yana iwakana mamalina Keliso giive-  
mogatalina.*

<sup>1</sup> Tova tuwai-moena, Yaubada yana nuwanuwa  
moyaina kabisona kabisona yana falofitayavo  
giawaveleveledi, ada wai tulina tulina wagaidiya  
badi iawatalatalainena tamadeyavo nagona wa-  
gaidiya.

<sup>2</sup> E aku malinai tova anaebalauyabu  
anayadayada-dina wagaidiya ani Tauna Natuna  
wagaine givona wagaideya. Yaubada Natuna-  
nai wagaine gaitoma matatabuna babiya ke  
gabameya gibubudi,<sup>†</sup> ada kaduwe Yaubada  
givenuwadadanena Banae gaitoma matatabuna  
gina vetoinavuvunedi.

<sup>3</sup> Kauwana yana malina kelasi wagaine  
kakivenamanamalina anafaiweya, Banae  
Yaubada Natuna ani Yaubada yana iwakana  
mamalina gikivenamanamalina. Ada Yaubada  
anaitaita ke yana veuluva giseyegemonena,  
kaduwe Natuna anaitaita anafaiweya, au

---

<sup>†</sup> 1:2 Kol 1:16

anunudi seyana.† Ada Yaubada Natuna gaitoma moyaidi gabameya ke babiya yana vona wa anatoyogina wagaine gisedoned i ke giitaitaveyabidi. Banae yana alika wagaine ide kaliva yada koyona anaikolayavula gibubuna ayo gilaka gabameya ke givetogana Togetane-mwane aiyatagine, ivi-nai wa anavemoimoina wagaine.†

*Keliso aneloseyavo gitubusegedi.*

<sup>4</sup> Yaubada aiyatagine Natuna givetoga e ada taidei wagaine kaalamanena Banae anayegana lakai-moena ayo aneloseyavo, anafaiweya anavewaga-nai givelena ani lakai-moena ayo aneloseyavo adivewaga.†

<sup>5</sup> Kaalamanena velemoena Yaubada Natuna anavewaga lakai-moena, faina tuwai-moena givonayena Buki Tabu wagaine Natuna faine, givonaga,

“Oyeni ani Iya Natuku.  
Malinai Iya gavetama O wagainiya.” †

Ada kaduwe Yaubada givonaga,

“Iyayeku Banae Tamana,  
ada Banae ani Iya Natuku.” †

E aku keke tamo tova gidavona anafaiweya anelose seyana wagaine, keke-mowa. Bana Natuna anakaibe-mowa wagaine givona anafaiweya.

---

† 1:3 2Kol 4:4, Kol 1:15 † 1:3 Ibel 8:1-2 † 1:4 Fip 2:9 † 1:5 Sam 2:7 † 1:5 2Sam 7:14

<sup>6</sup> Ada kaduwe tova-nai Yaubada Natuna to-moinagona gina imilina babiya, aneloseyavo wagaidiya givonaga,

“Imi yaku aneloseyavo, wa yami vemoimoina nodi wana oduodu Banae wagaine.”

<sup>7</sup> Aku aneloseyavo ani faidiya Yaubada givona,

“Iya yaku aneloseyavo gabubudi ani yadi madu vaita mala anafaiweya.  
Badi yaku togugaiyavo vaita aiyabeyabela meyana anafaiweya.”

<sup>8</sup> E aku Natuna ani Yaubada givonena, givonaga,

“O Yaubada, una vetoveimeya-vagata ke vagata.

Wa ya nuwanuwa tunutunugina uveiveimeya ya ebaveimeya wagaine.

<sup>9</sup> O nuwanuwa lakaina dewa yegayegana aku dewa koyona udibusoyogena.

Tainei faina Iya ya Yaubada ayegana gakilakai-moena

ada vemwamwala anabunama gaiwana wagainiya.

Tubuiyamomo tokwayabu ivemwamwala, aku Oyeni ani uvemwamwala-mowa.” †

<sup>10</sup> Ada kaduwe Yaubada Natuna faine givona,

“Oyeni ani Kauveya, ebavevuvu-mowa wa-

---

† 1:9 Sam 45:6-7

gaine babi ububuna,  
ke Tauni nimanika-mwaeya gabama  
ububudi.

<sup>11</sup> Gaitoma-dina aimo ina avari,  
aku Oyeni ani miyamiyani-vagai.  
Anafaiweya nuya gina miyamiya aku  
aimo anaiwakana gina avaina ke  
gina vetuwai-mowa,  
kaduwe babi ke gabama aimo ina vetuwai  
ada yadi iwakana gina avari.

<sup>12</sup> Gaitoma-dina aimo una uwadi nuya  
tuwadi  
anafaiweya, ke una sevedavedamadi.  
Aku Oyeni umiya-vagata, keke  
uda sevedavedama,  
ada ya tova keke anaebalauyabu.” †

<sup>13</sup> Kaduwe seyana tova Yaubada givona Natuna  
wagine, givonaga,

“Aiyatagikuya una vetoga analaba  
nibaimomo gana seobuyedi  
ada yadi toyogina ani gina avaina vele-  
moena.” †

E aku keke tamo tova gidavona anafaiweya  
anelose seyana wagine.

<sup>14</sup> Kai tayuwe anafaiweya, aga gavega  
aneloseyavo? Badiyavo Yaubada yana  
togugaiyavo, au aluwaluwa giimiilidi ke  
badiyavo gavega yana kibababala ina nuwagana

---

† **1:12** Sam 102:25-27 † **1:13** Sam 110:1

ani ilemelemedi.†

## 2

### *Keliso ani adakibababala anaKauveya.*

<sup>1</sup> E ada ide kaalamanena Yaubada Natuna anayegana lakai-moena faina, giluboda-moeda Yaubada yana nuwanuwa velemoena bade-mowa kanogalidi ani kana nuwaveyalai-vagaidi. Keke kana venuwavuluyedi aenanai waka mainuwana mainuwana mala gialugena anafaiweya, ide yada vetumagana mainuwana mainuwana gina kabekabebena wai tunutunugina wagainede-  
deya.

<sup>2</sup> Tova tuwaina Yaubada yana veimeya anelose awadiya-deya Mosese givelena. Anelose awadiya giyegemona ada wada vona velemoena ani kaalamanena. Ada kai tamo gaito gina yawelina o kai gina dibusoyogena, aga analaufata matavuloga gina nuwagana koyona seyana seyana faine analauboda anafaiweya.

<sup>3</sup> Aku malinai kibababala lakai-vagaina gielai wagaideya, keke anelose awadiya-deya aku yada Kauveya Yeisu wagaine. E ada kai kana vegaitoma-kavokavovoyena, aga keke maita adafaiweya adamatavuloga kanaose.† Taidei kibababala-nai ani nagona Kauveya gimadu awatalatalainena, ada badi gavega inogalina ani iluvetoyogi-moena ide wagaideya.

<sup>4</sup> Ada keke badi tomadunogala gaga ida luvetoyogi aku kadu Yaubada Tauna nodi

---

† **1:14** Eba 19:15-16, Iyeg 23:20, Tovei 13:3-7, Sam 91:11-12, Dan 3:28, 6:22, Mad 1:20, 2:13,19, 18:10, 28:5, Luk 1:11, Gug 8:26, 10:3, 12:7-10    † **2:3** Ibel 12:25

giluvetoyogina, faina Banae yana toyogina anaiyaiyaya ke ebanuwavogana giseyegemonedi ada gugai ebameyasidobodobo tulina tulina gifaisewadi. Kaduwe adanuwakabubu Aluwaluwa Tabuna wagaine-deya giavetave-talena wagaideya Tauna yana nuwanuwa anafaiweya. Taidei gaitoma-dina wagaidiya Yaubada yana kibababala giawavelemoenayena, e ada moyaida kana alamanena yana kibababala ani au velemoena.

*Keliso kaliva gitubusegedi, Banae lakai-moena.*

<sup>5</sup> E, ada Yaubada keke aneloseyavo adiveimeya gidasei vaita tova gielaelai wagaine ide kaliva ani yadi veimeya dibune kanamiya. Taidei ide yada miya tova gielaelai faine gaifufuyena.

<sup>6</sup> Aku tuwai-vagina seyana kaliva yana vona givetokilumina Yaubada wagaine, givona,

“Ime kaliva-mowa amayegana kabisona,  
e aku gavaiyamu-yo unuwanuwa faimeya?  
Imeyavo keke wa yama iwakana aku  
uitaitaveyabima.

<sup>7</sup> Uveimeya ada ime amiyaobu anelose  
dibudiya tova maufona wagaine.  
Velemoena ime keke amayegana lakaidi  
nonogana  
amayegana ukilakaina ada wa yama  
iwakana amiyamiya.

<sup>8</sup> Kaduwe gaitoma matatabuna usena age  
ayavavama dibune.” †

---

† 2:8 Sam 8:4-6, 1Kol 15:24-26

Taidei anafaiweya vona-nai ivetokilumina. E ada Yaubada ide tomiyababi giawaegeda kana vetoveimeya gaitoma moyaina wagaidiya, ada keke tamo gavagaitoma gida silove ke kana veimeye. Aku tova malinai kaitaitana vaita gaitoma matatabuna aimo keke kaliva ida veiveimeyedi.

<sup>9</sup> E aku Yeisu kaitaitana, Banae Yaubada giveimeye ke tova maufona wagaine gimiyaobu anelose dibudiya. Yaubada yana veimeya wagaine Yeisu giobuelai wagaideya ke gialika yada koyona faidiya, e ada tova maufona wagaine gabama anaaneloseyavo ikaiwabusegena. Yaubada yana nuwanuwa ani yana nuwadogeya Yeisu alika gida nuwagana ide seyana seyana faideya. Ada Yeisu alika anauloulolo golagolana lakaina faideya ginuwagana faina, Yaubada anayegana gikilakaina.<sup>†</sup> E, anafaiweya kini kuluwadiya adikedukedu kaikaiwabuna isesena, ani kadu anafaiweya Yaubada kedukedu kaikaiwabuna gisena Yeisu kuluwane, aku kedukedu-nai anavewaga ani 'yegana lakaina' ada kaduwe 'iwakana mamalina'.

<sup>10</sup> Gaitoma moyaina vuvuna ani Banae Yaubada, ada Tauna faine gibubudi. Banae nuwanuwana ide kaliva gina vagauleda yana ehaveimeya wagaine, ke ide moyaida natunavo yana iwakana mamalina kana nuwagana. Taidei faina analauboda Natuna Yeisu giawaegena uloulolo wagaine, ada taide wagaine gikivelaubodana ke adakibababala anawai

---

<sup>†</sup> 2:9 Fip 2:8-9



givunana.<sup>†</sup>

<sup>11</sup> Faina Yeisu Banae gikikivetabuda ada ide tabutabudeyavo ani moyaida Tamada au seya-moena, Banae Yaubada. Taidei vuvuna-nai Yeisu keke ide gida vovomumuyeda aku giawave-taineda,<sup>†</sup>

<sup>12</sup> e ada ide faideya givona Tamana wagaine, givona,

“Oye ayegana gana ifuifufuyena kaikuweyavo wagaidiya.

Tova-nai ina miyavagauta aoduodu wagaine, adimwatuguya gana kwelidavadavani.”<sup>†</sup>

<sup>13</sup> Ada kaduwe givona,

“Iya yaku vetumagana ganasena Yaubada wagaine.”<sup>†</sup>

Kaduwe givonaga,

“Iyayeku ada kadu biyabiyama-dina Yaubada giveleku

ani nodi idauwe amiyamiya.”<sup>†</sup>

<sup>14</sup> Ada taidei biyabiyama-dina giifufuyedi ani ideyavo kaliva ke vevine, wa vovoda ke wa dayagida katubuga. Ada ide vovo ke dayaga wagaine katubuga faina, kaduwe Yeisu Banae adanuya giosena ada givekaliva ide anafaiweya wa vovona ke wa dayagina. E ada Yeisu yana alika

---

<sup>†</sup> **2:10** Ibel 5:8-9    <sup>†</sup> **2:11** Mak 3:35    <sup>†</sup> **2:12** Sam 22:22    <sup>†</sup> **2:13** Ais 8:17    <sup>†</sup> **2:13** Ais 8:18

wagaina Seitani, banae alika anatoveimeya ani  
yana toyogina gina luyavulena.†

<sup>15</sup> Ide yawaida matatabuna wagaidiya alika kamamatausena, e ada vaita ide yogoyogodeyavo alika anamatauta wagaine. E aku Yeisu yana alika wagaine gietoyavuda.

<sup>16</sup> Keke aneloseyavo faidiya gidaela gina lemedi faina, aku velemoena ide Ebelaamo yana tubudelideli faideya giela gina lemeda faina.

<sup>17</sup> Ada ide kaliva gina lemeda faina, analauboda kaliva vovoda gida osena e ada ide babiya kamiyamiya anafaiweya, Banae kaduwe gida miyamiya.† Ada ide adalutovona moyaina gilutovonidi faina, tova moyaina Bana wa yana nuwakalikali ke wa yana idibumwaiga Yaubada yana veyavo anatovegugai aditonagona anafaisewa ginaabi-dewedewena. Ada kaduwe taidei wagaine Yeisu anafaiweya Tauna gina vebolavoiyena kaliva yada koyona faidiya, e ada Yaubada yana nuwakoyo yada koyona faidiya ani nuwana gina bubuna.

<sup>18</sup> Yeisu yana miyami babi wagaine anatoveya, aladibidibi anavita moyaina gilutovonidi anafai-weya ide kaliva.† E ada aladibidibi anavita moyaina gilutovonidi faina, Banae anafata ide aladibidibi kanuwanuwagana ani gina lemeda.†

# 3

*Yeisu lakai-moena muliya-yo Mosese.*

† **2:14** 1Iyo 3:8    † **2:17** Fip 2:7    † **2:18** Mad 4:1-11    † **2:18** Ibel  
4:15-16

<sup>1</sup> E ada tubuiyakuweyavo tabutabumi, imiyavo kaduwe Iya nodi Yaubada gidouweda yana yoo ke aimo nodi gabameya kana miyamiya, ani Yeisu wana nuwanuwayena, Banae kaawamogatalena yada afositolo ke kaduwe veyavo anatovegugai aditonagona.†

<sup>2</sup> Banae tainei faisewa-nai faina Yaubada givenuwadadanena ani tova moyaina gimatawalewaleyena. Tuwai-moena Mosese tova moyaina Yaubada yana nuwanuwa giidibumwaigena ke gifaisewa yana yoo adimwatuguya anafaiweya,† Yeisu tova moyaina Yaubada yana nuwanuwa giidibumwaigena.

<sup>3-4</sup> Manuwa seyana seyana wa anatoiyogona, aku Banae-menai gaitoma matatabuna giyogodi ani Yaubada. Ada manuwa anatoiyogona kaawadavadana aku manuwa-moena tauna anaawadavadana ani tufona gagana. E ada anafaiweya Yaubada ani Yeisu anayegana gikilakai-moena, e ayo Mosese faine ani tufona gagana.

<sup>5</sup> Banae Mosese ani tova moyaina gimatawalewale velemoena Yaubada yana manuwa matatabuna wagaine, tainei yana yoo,† aku banae au togugai. Yana gugai-nai ani seyana ebaita Yaubada yana nuwanuwa velemoena aimo gina ivemogatalina faina.

<sup>6</sup> Aku Keliso ani Banae keke Yaubada yana togugai aku au Natuna, ada tova moyaina wa yana idibudibumwaiga Yaubada yana manuwa giveiveimeyena. Ada ide tovetumagana ani yana manuwa-nai. Aku gilubodada yada asevatu kana kidone-

---

† 3:1 Ibel 4:14, 12:2-3    † 3:2 Naba 12:7    † 3:5 Naba 12:7

vagaina,<sup>†</sup> ada kaduwe gaitoma-dina Yaubada givonadabadabayedi faideya ani wa yada vetumagana kana bodabodadi. Kai taidei anafaiweya kana dewadewa, aga ide Banae yana manuwa.

*Veyawai-nai ide Yaubada yana yoo faideya.*

<sup>7</sup> Yada asevatu kada kidone-vagaina, faina Buki Tabu wagaine Aluwaluwa Tabuna givona,

“Malinai kai Iya Yaubada bonaku wana nogalina,

<sup>8</sup> aga keke aseasemi wana kivekugadi ke tagami wana ivekuludi, aku bonaku wana venogalena.

Keke wanadewa anafaiweya tamamiyavo nagona,

badi tuwai-moena adigaluvaluva inuwagadi fafali kavovona wagaine

ada Iya yadi Yaubada idibusoyogeku.<sup>†</sup>

<sup>9</sup> Wadedeku malamala foti (40) wagaidiya badi matadiya gugai ebameyasidobodobo gagugaiyedi e ada

ina matawalewaleyeku,<sup>†</sup> aku wa yadi dibu- soyoga idewa koyona

ke yaku atuvefaila igaluvaluvana.

<sup>10</sup> Taidei faina ganuwakoyo tayuwe tova-nai anayoo wagaidiya ada gavonaga,

“Tova moyaina yadi nuwanuwa imadu- kavokavovo ke wai

tunutunugina inuvuyoyena. Keke nuwadi gidamali yaku dewa wagaidiya.’

<sup>†</sup> 3:6 Ibel 3:14, 10:23    <sup>†</sup> 3:8 Iyeg 17:7, Naba 20:2-8    <sup>†</sup> 3:9 Gug 7:36

<sup>11</sup> E ada wa yaku nuwakoyo gavondabadaba toyogina,  
gavonaga, 'Biyavo-dina keke-bamowa  
gana awaegedi inaluku yaku ebaveyawai  
wagaine.' "†

<sup>12</sup> Tubuiyakuweyavo, tuwai-moena tamamiyavo  
nagona tagadi ivekuludi faina, keke adifai-  
weya inaluku Yaubada yana ebaveyawai wa-  
gaine. E ada taumiyavo wana itaveyabimi ae-  
nanai tamo gaito wagaimiya-deya nuwanuwa  
koyona aseasene gimiyamiya. Kai taidei anafai-  
weya, aga meyameyagani-moena yana vetu-  
magana gina segena ke Yaubada miyamiyani-  
vagaina gina vedomobubusena.

<sup>13</sup> Yaubada tova giawaegena ide wagaideya  
ke wagaine bonana kana venogalena. Taidei  
faina mwatugu-nai wagaine giawaegena wa-  
gaideya ani yadayada seyana seyana taudeyavo  
kanavona aseptuda, aenanai koyona yana fwaya  
nuwada gina vaina ke aseaseda gina kivekugana.

<sup>14</sup> Faina kai malinai Keliso kana vetumaganena  
anafaiweya nagona, ada yada vetumagana  
kana abidonena ke atuvefaileya kana nunauwena  
yawaida anamatatabuna wagaine,† aga ide Keliso  
anaalamana anaiwakana kanavai-vagaina ada  
kibababala-nai givaina faideya ani kana nuwaga-  
vagaina.

<sup>15</sup> Vona-nai ani wana nuwenuwena, givona,

"Malinai kai Iya Yaubada bonaku

---

† 3:11 Sam 95:7-11, Naba 14:21-23    † 3:14 Ibel 3:6, 10:23, 1Kol 15:2

wana nogalina,  
aga keke aseasemi wana kivekugadi ke tagami  
wana ivekuludi,  
aku bonaku wana venogalena.  
Keke wanadewa anafaiweya tamamiyavo  
nagona,  
badi tuwai-moena Iya yadi Yaubada idibu-  
soyogeku.” †

<sup>16</sup> Faina gavega Yaubada bonana inogalina  
nonogana idebaitoyoga?† Badi moyaidi ani  
Mosese ginagoyedi iyegemona Itipita wagaine.

<sup>17</sup> Ada kaduwe, gavega wagaidiya Yaubada  
ginuwanuwakoyo malamala foti (40) wagaidiya?  
Badi biyavo-dina ani ikoyokoyona fafali  
kavovona wagaine e ada analaufata moyaidi  
ivealialika wadedeku-deya.

<sup>18</sup> Ada gavega faidiya Yaubada givonad-  
abadaba, givona, “Biyavo-dina keke-bamowa  
gana awaegedi inaluku yaku ebaveyawai  
wagaine”? Au anafaiweya, biyavo-dina yana  
veimeya iawaegegena ani wagaidiya.

<sup>19</sup> E ada taidei kaitanuwigana ani biyavo-dina  
keke adiawaega inaluku, faina keke Yaubada  
ida vetumagane.

## 4

<sup>1</sup> E aku Yaubada yana yoo yadi luku yana  
ebaveyawai wagaine, ani anavonadabadaba  
aimo yavuyavuna gimiyamiya. Taidei faina  
wa yada matauta taudeyavo kana itaveyabida  
aenanai tamo gaito wagaideya Yaubada

---

† 3:15 Sam 95:7-8 † 3:16 Naba 14:1-38, 2Vei 1:34-35

gina vonena, “Oye auwe. Keke unaluku yaku ebaveyawai wagaine, faina keke afata.”

<sup>2</sup> Taudeyavo kana itaveyabida faina ideyavo bademowa valeya iwakana kanogalina anafaiweya tuwai-moena tamadeyavo nagona inogalina. Aku valeya-nai badi inogalina ani gaitoma-kavokavovo wagaidiya, faina wada au nogala gagana ada keke ida vetumagane.

<sup>3</sup> Aku ide gavega Yaubada kavetumaganena ani kaluku yana ebaveyawai-nai wagaine, aku badi keke ida vetumagane ani faidiya Yaubada givona,

“Taidei faina wa yaku nuwakoyo gavonadabadaba toyogina, gavonaga,

‘Biyavo-dina keke-bamowa gana awaegedi inaluku yaku ebaveyawai-nai wagaine.’ ” †

Taidei anafaiweya givona badi todibusoyoga faidiya, aku tova-nai babi matatabuna gibubuvaguvaguyena ke yana faisewa moyaina giluyabudi ayo gibodaboda, faina nuwanuwana yana yooyavo nodi ina veyawai.

<sup>4</sup> Faina yana buki wagaine givona yadayada anaveseveni faina, givona, “Ada Yaubada yana ibubuna bademowa matatabuna giluyabuna, ada yadayada anaveseveni wagaine giveyawai yana gugai anamatatabuna wagaine.” †

<sup>5</sup> Ada kaduwe yana vona bademowa gaifufuyena ani anafaiweya givonaga,

“Biyavo-dina keke-bamowa gana awaegedi

---

† 4:3 Sam 95:11 † 4:4 Eba 2:2

inaluku yaku ebaveyawai wagaine.”

<sup>6</sup> E ada Yaubada yana ebaveyawai aimo yavuyavuna gimiyamiya kaliva tufodi inaluku faina, aku badi gavega valeya iwakana imadunogalina ani bonana keke ida matawalewaleye e ada keke idaluku.

<sup>7</sup> Taidei faina Yaubada kaduwe tova seyana gisena ke wagaine yana yoo inaluku ina veyawai, ada yadayada-nai givewagana ‘malinai’. Mala-mala moyaina giavaidi, Yaubada givona Deivida wagaine ke banae givonayena givona,

“Malinai kai Iya Yaubada bonaku wana nogalina,  
aga keke aseasemi wana kivekugadi ke tagami wana ivekuludi,  
aku bonaku wana venogalena.”†

<sup>8</sup> Tuwai-moena aimo keke Deivida gida tubuga aku Mosese fatana Iyosuwa ani meIsileli ginagoyedi. Kai banae yoo-dina gida abidi gida lukuwedi Yaubada yana ebaveyawai-nai wagaine, aga aimo kadu tova seyana faina keke Deivida gida vonaye.

<sup>9</sup> Aku taidei anafaiweya givona faina, ide kaalamanena vaita Yaubada Tauna yana ibubuna giluyabu ada yadayada anaveseveni wagaine giveyawai anafaiweya, tayuwe veyawai-nai aimo yavuyavuna gimiyamiya ide Yaubada yana kalivayavo faideya.

<sup>10</sup> Faina badi gavega bade iluku Yaubada yana

---

† 4:7 Sam 95:7-8



ebaveyawai wagaine ke iveyaveyawai, ani kaduwe iveyaveyawai yadi gugai matatabuna wagaidiya, anafaiweya Yaubada Tauna giveyawai.†

11 Taidei faina wa yada atuefaila kana idibudibumwaiga ke kanaluku ebaveyawai-nai wagaine. Keke anafaiweya tamadeyavo nagona igadibudibusoyoga, aenanai kanabeu e ada keke kanaluku.

12 Faina Yaubada yana vona ani wa yawaina, ada wa yana toyogina gigugugai. Yana vona-nai ani manimanini-moena ayo benisi nigolugaluga.† Taidei benisi-nai anafata lulu anatubo gina lumwanuna ke ginaluku lulu anavutovuto gina nuwagana, aku Yaubada yana vona anafata maita ginaluku nuwafouda wagaine ke aluwaluwada gina nuwagana, e ada yada nuwainage ke gavana nuwanuwada kana gugai ani gikiveuveuyedi kai iwakadi o kai koyodi.

13 Keke tamo gava ibuibubuna ani sewasewavuyena Yaubada matane, aku gaitoma matatabuna mogamogatalina. Banae ide moyaida adaTovevonayavuga, ada yada nuwainage gialamanena ke giitavenuvenuwadadanedi kai iwakana o kai koyona.†

*Yeisu ani veyavo anatovegugai aditonagona lakaina gimiyamiya faideya.*

14 Aku ide faideya veyavo anatovegugai aditonagona lakaina gimiyamiya, Banae Yeisu

† 4:10 Eba 2:2-3 † 4:12 Efes 6:17, Ive 2:12 † 4:13 Lom 14:12

Yaubada Natuna giluku gabameya ke Yaubada matane gimiyamiya adavevonayavuga wagaine gina lemeda faina. E ada yada vetumagana tova moyaina kaawatalatalainena ani gilubodana kana kidonena.†

15 Banae veyavo anatovegugai aditonagona ani ide adafaiweya kana vetumaganena, faina Banae keke magilakalakavina aku velemona tonuwakalikali. Aladibidibi tulina tulina ide kanuwanuwagana anafaiweya, kaduwe Yeisu ginuwagana. Aku Banae ani keke gida koyona. E ada gayaunevaiseda ke yada kabekabebena gilutovonina.†

16 Taidei faina, wa yada asevatu kana nuyegemona Yaubada wagaine, Banae givetovetoga yana veimeya anaebavetoga kaikaiwabuna wagaine. Faina Banae ani Tonuwadoga-mowa, e ada yada koyona faina gina nuwakalikaliyeda. Ada kaduwe yada tova vitana wagaidiya wa yana nuwadoga gina lemeda.†

## 5

*Keliso lakai-moena ayo badi veyavo anatovegugai velugadiyavo.*

1 Veyavo anatovegugai aditonagonayavo seyana seyana, ani anavenuwadadana meIsileli wagaidiya-deya faina gana ifufu. Banae kaliva-nai Yaubada givenuwadadanena kaliva adimwatuguya ada banae kaliva faidiya gilukuluku Yaubada matane. Ada veyavo

---

† 4:14 Ibel 10:23    † 4:15 Ibel 2:18    † 4:16 Ibel 10:19-23

anatovegugai aditonagona-nai ani tova moyaina kaliva yadi nuwakabubu tulina tulina givaivaidi, ada kaduwe yadi kevakeva vebolavoi faina gimunumunudi Yaubada matane e ada dayagidi wagaine Banae yadi koyona givevenuwaegedi.

<sup>2</sup> Aku veyavo anatovegugai aditonagona ani banae kaliva-mowa, e ada badi imiya bavubavumowa Yaubada yana wai tunutunugina faina o kai imadunuvuyo, ani giitaitadi ke ginuwanuwa givona, “Kai Iya tamo tova kaduwe gana nuvuyo badi anafaiweya,” e ada banae nuwana gimalina gavaiyamu adilutovona ke anafata wa yana nuwaobu gina nuwakalikaliyedi.

<sup>3</sup> Tamo tova banae gikabekabebena ke koyona wagaine gibeu faina, gilubodana banae keke gina vebolavoi kaliva yadi koyona gagana faina, aku kaduwe banae tauna yana koyona faina.<sup>†</sup>

<sup>4</sup> Ivi-nai veyavo anatovegugai aditonagona ani anagugai lakaina velemonoena, ada wa anayegana lakai-moena. Ada keke tamo gaito tauna ivi-nai kaikaiwabuna ginavai, keke. Au Yaubada Tauna kaliva gina venuwadadanena ke ivi-nai gina veleno, Eloni anavenuwadadana ginuwagana anafaiweya.<sup>†</sup>

*Yaubada givenuwadadanena Natuna ke ivi-nai veyavo anatovegugai aditonagona wagaine ginamiya-vagata.*

<sup>5</sup> E ada kaduwe Bana Keliso anafaiweya, keke anavemoimoina faina Tauna gida kilakai ayo badi veyavo anatovegugai wagaidiya gida vetonagona,

---

<sup>†</sup> 5:3 Vei 16:6,24    <sup>†</sup> 5:4 Iyeg 28:1, 1Awa 23:13

keke. Aku tainei ivi-nai givaina faina Yaubada gimadu venuwadadanena, givonenaga,

“Oyeni ani Iya Natuku.  
Malinai Iya gavetama O wagainiya.” †

<sup>6</sup> Ada kaduwe yana vona Buki Tabu wagaine, givona,

“Oyeni ani veyavo anatovegugai anaivi wagainiya ginamiya-vagata.  
Tuwai-moena tainei ivi-nai  
Melikisedeki giabiabina anafaiweya,  
O kaduwe una abina.”†

<sup>7</sup> Tova-nai Yeisu wa vovona gimiyamiya babiya, wa yana tagiya nodi aku giveoveola bonana lakaina Yaubada wagaine, Banae anafata gina kibababalena alika wagaine.† Ada Yeisu nuwaobuya Tauna giawaegena Yaubada wagaine faina, yana veola givenogalena.

<sup>8</sup> Yeisu ani Banae Yaubada Natuna nonogana matawalewale anaalamana givaina gavana giulouloloyedi wagaidiya.

<sup>9</sup> Tova moyaina wa yana vemoimoina Tauna giawaegena anauloulolo wagaidiya e ada giasekumagedi Tamana matane. E ada ide gavega bonana kavenogalena, ani wagaideya Banae adakibababala-vagata vuvuna.

<sup>10</sup> Ada Yaubada givewagana veyavo anatovegugai aditonagana Melikisedeki anafaiweya.

---

† 5:5 Sam 2:7, Ibel 1:5 † 5:6 Sam 110:4, Ibel 7:1-3,15-17 † 5:7 Mad 26:36-46, Mak 14:32-42, Luk 22:39-46

*Yawai-vagata                      anavewala                      faina  
kana asekumaga.*

<sup>11</sup> Keliso Melikisedeki yana kabu givaina ani ananuwanuwa moyaina, ada gilubodana gada kivemalina wagaimiya aku yana vewala wagaimiya ani vitana, faina yami nuwamamala givekwalu-mowa Banae faine.

<sup>12</sup> Imiyavo ani tuwaina wanuwavilana ke wavebutu Yeisu wagaine wavetumagana, e ada vaita malinai amilauboda yana nuwanuwa wada alamane-dewedewena ayo wada vetovewala badi toyavuyoga wagaidiya. Aku imi aimo vaita bebeta anafaiweya, ada nuwanuwami susu gagana. Keke Yaubada yana wai anavewala wada alamane-dewedewe faina, susu gaga bebeta iyuyuga anafaiweya, Yaubada yana wai ananuwanuwa keke vitadi gagana ina vevewalemi. Keke aa kwakwana anafaiweya Yaubada yana wai ananuwanuwa vitana ina vewalemi, faina keke amifata.†

<sup>13</sup> Gavakaliva susu-gagana wagaine gimiyamiya, banae vaita bebeta. Ada bebeta gavana iwakana ke gavana koyona keke gida alamane anafaiweya, banae keke wa yana alamana Yaubada yana vona dewa yegayegana faina.

<sup>14</sup> Aku badi gavega aseasekumagidiyavo, ani aa kwakwana adilauboda, badi tovetumagana gavega Yaubada yana vona anaalamana wagaine bademowa taudiyavo tova moyaina ivevewaledi, e ada gavana iwakana ke koyona adiitanuwaga ani keke vitana faidiya.†

---

† 5:12 1Kol 3:1-3    † 5:14 Lom 16:19

## 6

<sup>1</sup> Imi yami alamana Keliso faine ani aimoina-mowa anafaiweya nagona wamaduvetumagana, aku alamana-dina vaita bademowa wadavai. E ada yana vewala vuvuna, ani keke gida luboda yami tovewalayavo aimo ida vewala-vavagilemi ke ida nunauwe, aku Yaubada yana lemeya wana naunau analaba yana vona anaalamana matatabuna wagaidiya wana asekumaga. Manuwa evaguna anaiyogona wagaine, keke tova moyaina ogola kada kikivemididi ayo kadu kada vaivaiyavuledi babi wagaine, keke-mowa. Ada kadu anafaiweya, vewala kamadu vetumaganena ani keke tova moyaina kada luvavagile kadavona, “Wana nuwavilana ada Yaubada wana vetumaganena, e ada yami dewa koyona faidiya keke wana alika.”

<sup>2</sup> Ada kaduwe vewala babitaiso faidiya, ni-maibo kaliva kuluwadiya faina, toalika yadi yawa-vagila faina, ada vonayavuga ke kaliva yadi koyona analaufata faina matavuloga-vagata ina nuwagana.

<sup>3</sup> Ada Yaubada yana awaegeya kananau-mowa vewala vitadi wagaidiya ke adialamana kana vaidi.

<sup>4</sup> Gavaiyamu-yo yami veasevatu faina gana vewalemi? Faina badi gavega tuwaina Yaubada gilemedi ke anaalamana wagaine nuwadi gimalina aku muliya Natuna Yeisu ivedomobubuse-moena, ani keke adafaiweya kana lemedi ke kaduwe ina nuwavilana-vagila, keke-mowa. Biyavo-dina tuwaina Yaubada yana nuwamalina ke yana nuwakabubu ilutovonina,

ada Aluwaluwa Tabuna aseasediya giluku.

<sup>5</sup> Badi bademowa Yaubada yana vona anaiwakana ilutovonina, ada kaduwe ida tova malinai wagaine Keliso yana toyogina aimo tova gielaelai gina seyegemonena, ani bademowa iitanuwagana.

<sup>6</sup> Kai tainei Yaubada yana wai anagaitoma moyaina ilutovonina aku ivedomobubuse-moena, aga gavaiyamu tamo wai gimiyamiya faidiya ayo Yaubada wagaine ina nuwavila-vagiledi? Keke, keke tamo wai gida miyami ke kaduwe ina nuwavila, faina Yaubada ivedomobubusena wagaine, ani vaita Yaubada Natuna kaduwe ida kivebolagalagana e ada yoo matadiya ida kivevovomumuna.<sup>†</sup>

<sup>7</sup> Aku toidibumwaiga ada todibusoyoga-mowa ani adiebavonaluvefosa seyana gana ifufuyena. Kaliva tufodi vaita babi anafaiweya. Kai tova moyaina wei gina lugalugaga ada babi gina vevebutana ke aa ina tabotabo iwakana, aga tonibakula guwa iwakana ina vaivaina. Taidei babi-nai Yaubada wa yana nuwadoga gilemele-mena. Taidei anafaiweya badi tova moyaina Yaubada yana nuwanuwa imatawalewalevedi, biyavo-dina Yaubada yana nuwadoga wagaine leme tulina tulina inunuwagadi ada guwadi kaitaitanuwagadi.

<sup>8</sup> Aku badi Keliso ivedomobubuse-moena ani anafaiweya babi-nai gudana sikakakamidi itabotabo wagaine-deya, wada-nai keke wa anaiwakana ada anaita vaita alatabutabu gida nuwagana. E ada anaebalauyabu ani ai

---

<sup>†</sup> 6:6 Ibel 10:26-29

alalata wagaine babi-nai gina alaina.

<sup>9</sup> Taidei anafaiweya gavonavona badi biyavodina Keliso ivedomobubusena faidiya. E aku imi tubuiya aseasemeyavo, anuwaveyalaina vaita Yaubada anaalamana waitaitaveyabina ke wanaunau kibababala anawai wagaine.

<sup>10</sup> Yaubada Banae yana dewa tunutunugina faina, imi wa yami nuwakabubu nodi wafaifaisewa ani yami gugai keke gina venuwavuluyedi. Gialamanena tuwaina yana kaliva tabutabudiyavo walemedi ada yami leme-dina waaliyedi tova malinai, ada kaduwe aimo walemelemedi, ada yami leme-dina wagaidiya yami nuwakabubu Yaubada wagaine waseseyegemonena.†

<sup>11</sup> Velemoena imiyavo bademowa waawaegemi Yaubada wagaine, aku nuwanuwaku lakaina ani imi seyana seyana yami awaega wana naunauwena yawaimi matatabuna wagaidiya,† e ada gavana Yaubada givonadabadabayena ide yana yooyavo faideya ada wanuwavetumaganena, ani matatabuna wana nuwagana.

<sup>12</sup> E ada keke nuwanuwaku wana kwameme, aku badi gavega wa yadi vetumagana ke wa yadi atufefaila iluveyabina-vagata Yaubada wagaine, ani wana gaveuveuledi. Taidei wagaine gavana iwakana Yaubada givonadabadabayena, ani imiyavo kaduwe wana nuwagana anafaiweya badi inuwagana.

---

† 6:10 1Kol 15:58    † 6:11 Ibel 3:14



*Yaubada yana vonadabadaba iyegemona vele-moena.*

<sup>13</sup> Wana itana, tuwai-moena Yaubada givonadabadaba Ebelaamo wagaine. Aku gaito anayegana giinana yana vonadabadaba wagaine? Keke tamo gaito Yaubada gida toyogisege ayo totoyogina-nai anayeganeya gina vonadabadaba, e ada Tauna anayeganeya givonadabadaba,

<sup>14</sup> givona, “Iya vona velemoena wa yaku nuwadoga gana gugai iwakana wagainiya, ada ya tubudelideliyavo adiyoo gana kiveinalina.” †

<sup>15</sup> Ada taidei faina Ebelaamo wa yana atuve-faila gibodana, ada gavana Yaubada givonadabadabayena wagaine ani ginuwagana.

<sup>16</sup> E ada nuwamiya gida miyamiya, kai kaliva gina vonadabadaba toyogina, aga seyana kaliva anayegana lakaina gina inanana, ada tayuwe wagaine kaliva moyaidi ina alamanena yana vona au velemoena, ada keke tamo gaito yana vonadabadaba-nai faina ina vevonavona.

<sup>17</sup> Yaubada nuwanuwana badi gavega yana kibababala anavonadabadaba ina nuwagana, ani ina alamane-dewedewena vaita yana nuwanuwana keke maita gina sivedavedama. Ada taidei faina Yaubada Tauna anayeganeya givonadabadaba, ada yana vonadabadaba-nai ani au giluve-toyogina.

<sup>18</sup> Ada yana vonadabadaba ke gaitoma-nai giluvetoyogina wagaine, tainei Tauna anayegana giluinanana, tainei gaitoma-dina iluwei ani

---

† 6:14 Eba 22:16-17

keke maita ina sivedavedama ada kaduwe keke-mowa gina yawelidi, e ada luwei-dina wagaidiya kaalamanena Yaubada keke-mowa gina fwaya.<sup>†</sup> Ada yana vonadabadaba-nai wagaideya kavetumaganena ani keke maita gina luyawelidi faina, ide kaota kanau Yaubada wagaine kaveibaba ani adafaiweya kana asevatu-mowa ke kana alamanena velemoena adakibababala-nai kanuwavetumaganena, taidei kana abidonena.

<sup>19</sup> Ada yana vonadabadaba-nai kanuwavetumaganena ani wagaine yada nuwanuwa giluluveyabina. Tainei nuwada yadi ebaluveyabina ani toyogina ada keke vaita gina akaki, faina Yaubada yana kibababala givonadabadabayena, ani kana nuwavetumagane-moena. Ada waka analomu kana segena lai wagaine ke gikiveyabina anafaiweya, nuwada yana ebaluveyabina kasegena ke gilukuluku nuya ebasebabala muline.

<sup>20</sup> Wadedeku<sup>\*\*</sup> Yeisu wai ginagona ke ide faideya gimaduluku Tutulagolota Tabutabu-moena gabama wagaine. Ada Banae Yaubada gisena yana veyavo anatovegugai aditonagona miyamiyani-vagaina, Melikisedeki anafaiweya.

## 7

---

<sup>†</sup> **6:18** Naba 23:19, Tai 1:2

**\*\* 6:20** Tuwai-moena Tutulagolota Tabutabu-moena anawana anaebasebabala ani meIsileli yadi veyavo anatovegugai aditonagona giyavuyavuna ke gilukuluku Yaubada matane (Vei 16:2,15, Ibel 9:3). Ada kadu anafaiweya, Yeisu Banae veyavo anatovegugai aditonagona ani giluku Yaubada yana ebamiya gabameya, wada fafali tabutabu-moena.

*Veyavo anatovegugai Melikisedeki ifuifufuna.*

<sup>1</sup> Melikisedeki faine gana ifufu ke nuwami gina malina. Banae melala anayegana Salema anakini, ke kaduwe Yaubada Togetanemwane yana veyavo anatovegugai. Aku Ebelaamo ginau ada gilugaviya kiniyavo adilaufuli wa yadi tolugaviya nodi ke giluvealika-yabudi, ada giyewayewana yana melaleya ani Melikisedeki ginuwagana ada givona, “Ebelaamo, gavoneni velemono, Yaubada wa yana nuwadoga gina lemelemoni.” †

<sup>2</sup> Ada Ebelaamo gaviyeya givetoyogina ke lokoloko-dina moyaina givaidi ani givutugedi bou teni wagaidiya aku bou seyana ani Melikisedeki givelena anavutuga. Melikisedeki anayegana anakivila ani ‘dewa yegayegana anakini’. Ada kaduwe banae ani ‘kukuya anakini’ faina ‘Salema’ anakivila ‘kukuya’.

<sup>3</sup> Banae inana ke tamana keke, ada kaduwe tamanavo nagona keke, ada yawaina anaebavevuvu ke anaebalauyabu adiyadayada ani keke tamo anaalamana. Ada veyavo anatovegugai ivi-nai giabi-vagaina anafaiweya, Yaubada Natuna ivi-nai giabiabi-vagaina.

<sup>4</sup> Wana itana, Melikisedeki banae ani wa anavemoimoina ke wa anayegana lakai-moena. Faina Ebelaamo ani banae tamada nagona ada ide melisileli moyaida wagainede-ya katubuyegemona ke kaduwe anayegana lakaina nonogana, Ebelaamo gialamanena Melikisedeki lakai-moena, ada taidei faina yana lokoloko-dina gaviyeya givaidi, ani anabou

---

† 7:1 Eba 14:17-20

teni-dina wagaidiya-deya seyana givai givelena Melikisedeki.

<sup>5</sup> Ada Livai yana tubudelideliyavo kaliva, badi veyavo anatovegugai anaivi-nai inuwagana ani Yaubada yana Veimeya anabuki wagaine adiveimeya seyana giveledi taidei anafaiweya. MeIsileli moyaidi yadi bavagu ke yadi giba inuwanuwagadi ani ina vutuvutugedi bou teni anafaiweya, aku bou seyana Livai yana tubudelideli ina veleveledi.<sup>†</sup> Taudiyavo tubuiyadiyavo, badi kaduwe Ebelaamo yana tubudelideli nonogana bou seyana ikidewedewena ke veyavo anatovegugai adilo iweleveledi.

<sup>6</sup> E aku Melikisedeki ani banae keke Livai unumina anakaliva, aku kaalamanena banae wa anavemoimoina faina bou seyana givaina Ebelaamo yana bou teni wagaidiya-deya. Ebelaamo banae kaliva lakaina ada Yaubada yana vonadabadaba bademowa ginuwagana<sup>†</sup> nonogana Melikisedeki giawanuwakabubuyena, givona, “Ebelaamo, o wagainiya gavona velemoena, Yaubada gina nuwanuwakabubuyeni ke gina lemelemeni.”

<sup>7</sup> Taidei anafaiweya giawanuwakabubuyena, ada bademowa kaalamanena vaita gavakaliva anayegana lakai-moena, ani banae awanuwakabubu gina velavelau banae gaito anayegana maita lakaina wagaine. Waitana? Tamada Ebelaamo anayegana lakaina nonogana Melikisedeki giawanuwakabubuyena, faina banae kaliva-nai ani anayegana lakai-moena.

<sup>8</sup> Badi veyavo anatovegugai-dina Livai

---

<sup>†</sup> 7:5 Naba 18:21    <sup>†</sup> 7:6 Lom 4:13

yana tubudelideli ani tova moyaina bou teni wagaidiya-deya bou seyana ivaivaina, badiyavo au kaliva ialialika, aku Melikisedeki ani bou seyana ginuwagana Ebelaamo wagaine-deya aku aimo wayawaina gimiyamiya, anafaiweya Buki Tabu wagaine givona.<sup>†</sup>

9-10 Kaduwe, Melikisedeki ke Ebelaamo nodi ivenuwaga, ada bou seyana Ebelaamo givelena anatoveya, Ebelaamo gaisena Livai aimo keke gida tubuga aku anavona anafaiweya, vaita banae bademowa Ebelaamo vovone gimiyamiya. Ada Livai gimiyamiya Ebelaamo vovona wagaine faina, ada anavona anafaiweya, vaita au game-nai Livai bademowa Melikisedeki bou anaveteni givelena. Livai anaunuma biyavo-dina veyavo anatovegugai, badiyavo ani bou seyana inuwanuwagana bou teni wagaidiya-deya. Aku anavona anafaiweya, Melikisedeki bademowa bou seyana givaina Livai wagaine-deya, kaalamanena Melikisedeki anayegana lakai-moen ayo Livai ke anaunuma nodi.

*Yeisu ani Melikisedeki anafaiweya.*

11 Tuwai-vagaina Mosese yana toveya Livai anaunuma anakalivayavo ani veyavo anatovegugai yadi faisewa Yaubada giveledi. Ada yana veimeya tulina tulina faidiya ani vuvuna wagaine-deya Yaubada yana veimeya meIsileli moyaidi faidiya gisena. Aku veyavo anatovegugai-dina Livai yana yoo wagaidiya, ani kai yadi faisewa wagaine kaliva moyaidi ida kiveyegayegane-yabudi ke Yaubada nodi

---

<sup>†</sup> 7:8 Iyo 6:57, Ive 1:17-18

ida veseyana-vagata, aga keke tamo vuvu ayo kadu veyavo anatovegugai seyana gida yegemo. Aku keke adifaiweya ina kiveyegayegane-yabuda faina,<sup>†</sup> kadu veyavo anatovegugai seyana bademowa giyegemona, ada keke Eloni banae Livai bwanenena anafaiweya aku Melikisedeki anafaiweya.

<sup>12</sup> Ada veyavo anatovegugai tulina gisena faina, gilubodana kaduwe yana veimeya gina sivedavedamana veyavo anatovegugai faidiya, e ada veyavo anatovegugai-nai tulina gina awaegena.

<sup>13</sup> Ada Banae gaifufuyena ani yada Kauveya Yeisu. Banae keke Livai unumina anakaliva aku gitubuyegemo unuma tulina wagaine-deya, unuma-nai wagaine keke tamo gaito wa anaveimeya ke veyavo anatovegugai anaivi gidavai ke gida gugai vebolavoi anadidiga wagaine.

<sup>14</sup> Faina bademowa mamalina vaita yada Kauveya ani gitubudelideli unuma-nai Iyuda wagaine-deya.<sup>†</sup> Aku unuma-nai Iyuda ani Mosese keke gida inana veyavo anatovegugai yadi faisewa faina, keke-mowa.

<sup>15</sup> Ada gavana ide kaifufuyena ani mamali-moena, faina kadu veyavo anatovegugai seyana bademowa giyegemona, Banae Melikisedeki anafaiweya.

<sup>16</sup> Banae ani Yeisu, bademowa giyegemona ada veyavo anatovegugai anaivi givaina. E aku Mosese yana veimeya wagaine ani taidei

---

<sup>†</sup> 7:11 Gal 2:21    <sup>†</sup> 7:14 Ais 11:1, Mai 5:2, Mad 1:3, 2:6, Luk 3:33, Ive 5:5

anafaiweya. Gilubodana veyavo anatovegugai seyana seyana ani Livai unumina anakaliva. Aku Yeisu keke Livai yana tubudelideli wagaine gida yegemona, e ada ivi-nai ani keke gida nuwaga Mosese yana veimeya anafaiweya, keke. Aku aiyada yana faisewa vuvuna ani yawai-vagata yana toyogina wagaine gimiyamiya, ada keke-mowa gina alika.

<sup>17</sup> Faina Buki Tabu wagaine givona,

“Oyeni ani Yaubada yana veyavo anatovegugai anaivi wagainiya ginamiya-vagata.

Tuwai-moena tainei ivi-nai Melikisedeki gi-abiabina anafaiweya,

O kaduwe una abina.”<sup>†</sup>

<sup>18</sup> Ada veimeya tuwaina veyavo anatovegugai faidiya ani iseliyedi tabae, faina veimeyadina keke wa yadi toyogina ada ivegaitomakavokavovo.

<sup>19</sup> Faina veimeya Mosese wagaine ani keke gida kiveyegayegane-yabuda ayo Yaubada nodi kada veseyana-vagata. E aku wai evaguna Yaubada giseyegemonena ani iwaka-moena, keke anafaiweya tuwaina, ada tainei wagaine ide adafaiweya kana yegemona Yaubada lilivane-mwane ke nodi kana veseyana velemonoena. Ada wai-nai iwakana ani Keliso.

<sup>20</sup> Aku Yaubada keke yana veyavo anatovegugai adiivi Yeisu gidavele-kavovo, aku yana vonadabadaba gikivetoyogina Tauna anayegana

---

<sup>†</sup> 7:17 Sam 110:4

giluinanana wagaine, e ayo ivi-nai givelena. Li-vai yana yoo anakalivayavo ani veyavo anatovegugai yadi faisewa ivaina wagaine, keke tamo gaito Yaubada anayegana gida luinana ayo ivi-nai gidavai, keke.

<sup>21</sup> Aku tova-nai Keliso ivi-nai veyavo anatovegugai givaina, Yaubada Tauna anayegana wagaine yana vonadabadaba-nai Banae faine ani gikive-toyogina, givona,

“Iya Yaubada Tauku akuyeganeya yaku vona-nai gaktivetoyogina,

ada keke-mowa yaku nuwanuwa  
gana sivedavedama.

Oyeni ani veyavo anatovegugai anaivi wa-gainiya ginamiya-vagata.” †

<sup>22</sup> Ada taidei anafaiweya Yaubada Tauna anayegana giluinanana ke yana vona-nai giluvetoyogina faina, yana veyavo anawai evaguna Yeisu wagaine giluvetoyogi-moena, ke iwaka-vagaina ayo veimeya-nai Mosese wagaine.†

<sup>23</sup> Kaduwe gaitoma seyana ani tuwaina veyavo anatovegugaiyavo moyai-moedi imiyamiya, aku aimo ina vesilakai ke ina alika e aku fatadi adiivi ina vaidi.

<sup>24</sup> Aku Yeisu ani Banae gimiyamiya-vagata faina, Yaubada yana veyavo anatovegugai anaivi giabi-vagaina. Keke tamo gaito gidafata, keke-mowa.

---

† 7:21 Sam 110:4    † 7:22 Ibel 8:6



25 Tainei faina ide gavega kanaunau Yaubada wagaine Yeisu anayeganeya, ani Banae anafaiweya-mowa gina kibababaleda. Faina Yeisu gimiya-miya-vagata ke ide faideya giveoveola Yaubada wagaine.†

26 Yeisu Banae tabutabuna, keke tamo koyona o kai bwanenene gida miyami wagaine aku yegayega-vagaina.† Ada Yaubada gisedakana tokoyona wagaidiya-deya ke gikilakaina gabama tabone-mwane ke Bana nodi imiyamiya. Ada taidei anafaiweya Yeisu anaitaita faina, Banae yada veyavo anatovegugai aditonagona ani ide adalauboda-mowa, faina adaleme tulina tulina Bana anafata.

27 Ada kaduwe, Banae keke yadayada seyana seyana gida vevebolavoi anafaiweya veyavo anatovegugai aditonagonayavo Livai yana yoo wagaidiya. Badiyavo nagona taudiyavo yadi koyona faina ina vebolavoi, ada muliya kaliva moyaidi yadi koyona faina ina vebolavoi. Aku Yeisu ani keke tamo tova gida koyona, e ada keke Tauna faine ehaveyavo gida faisewa aku ide tokoyona ani faideya. Au Banae tova seya-moena Tauna givebolavoiyena wagaine ehaveyavo gifaisewa-vagaina,† e ada tainei vebolavoi-nai wagaine anafata moyaida yada koyona gina venuwaegedi.

28 Mosese yana veimeya wagaine kaliva wa yadi kabekabebena ivevetonagona veyavo anatovegugai wagaidiya.† Aku veimeya-nai muline ani Yaubada yana vonadabadaba toyogina wagaine

---

† 7:25 Lom 8:34, 1Iyo 2:1    † 7:26 Mak 1:23-24, Luk 4:33-34, Ive 15:4, 16:5    † 7:27 Efes 5:2, Ibel 10:10    † 7:28 Ibel 5:1-2

Natuna anaveimeya givelena ke gina vetonagona yana veyavo anatovegugai wagaidiya.<sup>†</sup> Banae yana nuwanuwa ke yana dewa wagaidiya keke tamo wa yana koyona aku matatabu-moena ani iwaka-vagaina.

## 8

*Veyavo anawai Keliso gikiveyegemonina ani veyavo anawai tuwaina giveiwakasegena.*

<sup>1</sup> Gavana gavonayena ani ananuwanuwa lakaina taidei anafaiweya. Veyavo anatovegugai aditonagona ani bademowa ide faideya gimiyamiya. Banae givetovetoga Togetanemwane yana veimeya anaebavetoga kaikaiwabuna aiyatagine gabama wagaine,<sup>†</sup> ivi-nai wa anavemoimoina lakaina wagaine,

<sup>2</sup> ada wadedeku Yaubada yana manuwa anaTutulagolota Tabutabuna wagaine gifaifaisewa. Tayuwe manuwa sinininila tabutabuna-nai Yaubada Tauna gikivemididina, keke kaliva, anafaiweya manuwa sinininila tabutabuna ikivemididina babiya.\*\*

<sup>3</sup> Idedeku babiya veyavo anatovegugai aditonagona seyana seyana adiveimeya gimiyamiya, ani kaliva yadi nuwakabubu tulina tulina ke kevakeva ivevebolavoiyedi Yaubada wagaine.

---

<sup>†</sup> **7:28** Ibel 5:9    <sup>†</sup> **8:1** Mak 16:19, Ibel 1:3, 10:12    \*\* **8:2** Tova tuwai-moena wagaine meIsileli adiveimeya Yaubada givedi Mosese wagaine, e ada manuwa sinininila tabutabuna ebao-duodu faina ibubuna. Wada manuwa miyamiyani-vagaina anununa, aku gabameya manuwa-moena Yaubada giyogona. (Iyeg 33:7, Ibel 9:24)

E ada gilubodana taidei veyavo anatovegugai aditonagona-nai kaduwe tamo gavana yana nuwakabubu Yaubada matane gidasena.\*\*

<sup>4</sup> Kai Yeisu babiya gida miyamiya, aga Banae keke ivi-nai veyavo anavetogugai wagaine gida miyamiya, keke. Faina Yaubada yana veimeya givelena Mosese, ani bademowa giveimeya ke veyavo anatovegugaiyavo imiyamiya ke ivevebolavoi.

<sup>5</sup> Badi yadi gugai igugaiyena ani Yaubada yana manuwa tabu wagaine babi taidei wagaine, aku manuwa-nai ani anunu gaga givevewala gavana gabameya gimiyamiya.† Faina tova-nai Mosese gikidewadewa manuwa sinininila-nai gida iyogona, ani Yaubada Mosese givonamatawena, givona, “Una nogalina. Gaitoma matatabuna ani una bubudi adiita au gaveimeyeni oyeya anafaiweya.” †

<sup>6</sup> E, badi tuwaina-deya ifaifaisewa veyavo anawai tuwaina anaveimeya anafaiweya, aku malinai ani Yeisu gugai lakai-moena ginuwagana, keke anafaiweya badiyavo. E ada veyavo-nai anawai evaguna wagaine Yeisu givetomidigolota Yaubada ke ideyavo nefanideya, ani iwaka-moena ayo veyavo anawai tuwaina. Ada taidei faina veyavo anawai evaguna wa anavonadabadaba iwaka-moedi, ani veyavo anawai tuwaina giveiwakasegena.†

<sup>7</sup> Kai veyavo anawai nagona keke

---

\*\* **8:3** Tuwai-moena veyavo anatovegugaiyavo ani kevakeva ke aa ivevebolavoiyedi, aku Yeisu ani Tau-moena vovona givebolavoiyena. † **8:5** Kol 2:17, Ibel 10:1 † **8:5** Iyeg 25:40 † **8:6** 2Kol 3:6-11, Ibel 7:22, 9:15

wa anakoyona, aga keke Yaubada yana veyavo anawai anavelu gidasei. Aku velemoena veyavo-nai wa anakoyona, faina anaveimeya dibune kaliva keke adifaiweya veimeya-dina ina itaveyabidi ke ina yegayegana Banae matane.

<sup>8</sup> Faina tuwai-vagaina Yaubada yana yoo meIsileli yadi dewa keke yegayegana Bana matane. E ada givona,

“Iya KAUYEYA gavona,  
Una itana, aimo tova gielaelai wagaine  
Iya veyavo anawai evaguna gana bubuna  
meIsileli wagaidiya ada kaduwe meIyuda  
wagaidiya.

<sup>9</sup> Taidei veyavo anawai evaguna ani keke anafaiweya  
veyavo anawai tuwaina gabubuna  
tamadiyavo nagona wagaidiya,  
tova-nai gaabidi gayegemonedi Itipita  
wagaine-deya.  
Wadedeku yaku veyavo anawai gabubuna  
wagaidiya,  
aku keke ida atuvefailedi ke idamiya-mowa  
wagaine,  
e ada gavedomobubusedi.  
Taidei anafaiweya Iya KAUYEYA gavona.”

<sup>10</sup> Kaduwe Yaubada givona,

“Tayuwe tova tuwai-moena ani gina avaina  
ayo  
taidei veyavo anawai-nai gana bubuna  
meIsileli wagaidiya

ani taidei anafaiweya.

Yaku veimeya ganasedi nuwadiya

ada kaduwe aseasediya gana vetokilumidi.

Ada Iya yadi Yaubada gana miyamiya aku

badi Iya yaku kalivayavo ina miyamiya.

<sup>11</sup> Ada keke tamo gaito gina vewale kaliva  
o kai anatubuluga Iya akualamana faina ke  
ginavona, 'Gilubodana KAUVEYA  
una alamanena.'

Faina kaliva-kavokavovo ada ginanau

kaikaiwabudiyavo wagaidiya, moyaidi  
ina alamane-dewedewe-moeku.

<sup>12</sup> Faina badi yaku veimeya iawaegegedi ke  
iyawelidi nonogana gana nuwakalikaliyedi,  
ada yadi koyona ani keke-bamowa kaduwe  
gana nuwanuwayedi." †

Taidei anafaiweya Yaubada givona.

<sup>13</sup> Tainei yana veyavo-nai anawai givewagana  
'veyavo anawai evaguna' faina, tayuwe anaala-  
mana ani yana veyavo anawai nagona give-  
tuwai, e ada bademowa anatova giavaina. Ada  
givegaitoma-kavokavovo faina, tova kabisona  
gina avovolina.

## 9

*Oduodu anaveimeya veyavo anawai tuwaina  
wagaine.*

<sup>1</sup> Aku tayuwe veyavo anawai nagona wa-  
gaine Yaubada anaoduodu faina anaveimeya  
gimiyamiya, ada kaduwe manuwa tabu idedeku  
babiya.

---

† 8:12 Iyel 31:31-34

<sup>2</sup> Faina manuwa sinininila iyogona Yaubada yana ebamiya meIsileli adimwatuguya faina.† Negenine ani tutulagolota iluwei. Tutulagolota nagona ivewagana ‘Tutulagolota Tabutabuna’, ani wagaine mayale meyana anayoo seveni ke teibeli, ada teibeli-nai tabone beledi seseliyedi iawaegedi Yaubada faine ani imiyamiya.†

<sup>3</sup> Ada maita wanegenine, ani tutulagolota anavelu nuya badobadona wagaine isebabalina,† tainei banae ivewagana ‘Tutulagolota Tabutabumoena’.

<sup>4</sup> Tutulagolota-nai wadebaine, ani inisenisi anaebavebolavoi† taine ikiwafina gola wagaine. Aku Tutulagolota-nai negenine, ani Yaubada yana veyavo anawai anabokesi,† kadu matatabuna ikiwafina gola wagaine. Bokesi-nai negenine ani tuwava gola, wagaine aa anayegana ‘mana’ idodona, aa-nai tuwai-moena Yaubada meIsileli givekavekanidi fafali kavovona wagaine, kaduwe Eloni yana aiwala bademowa gilukabukabu, ada kaduwe Yaubada yana veyavo anawai tuwaina anaveimeya teni vetovetokilumidi kabala beyabeyadi wagaine imiyamiya.†

<sup>5</sup> Aku bokesi-nai anavetalaboda getane ani kilumina iluwei imiyamiya, ofadi manamanawedi ginau tufone kadu tufone, ada ivewagadi ‘selubima’. Badi Yaubada yana iwakana mamalina anaiyaiyaya. Ada

---

† 9:2 Iyeg 25:8    † 9:2 Iyeg 25:23-40    † 9:3 Iyeg 26:31-33, 40:3,21    † 9:4 Iyeg 30:1-10, 37:25-28, Luk 1:9-11 ke anaailabama adiebakivemala    † 9:4 Iyeg 25:10-16, 26:33, 40:3,21, Ive 11:19  
† 9:4 Iyeg 31:18, 2Vei 10:5

vetalaboda-nai tabone aku selubima agedi nefanine, ani fafali-nai wagaine veyavo anatovegugai aditonagona kevakeva dayagidiya gina lufuifuina.\*\* Taidei wagaine Yaubada nuwana gina bubuna yana nuwakoyo kaliva yadi koyona faine, e ada wa yana nuwakalikali yadi koyona-dina gina venuwaegedi. Fafali-nai ani badi selubima-dina ofadiya ilukabubuna.\*\* Aku auwe tova malinai tainei gaitoma-dina ananuwanuwa kabisona kabisona keke amafaiweya ana ifufuyedi.†

<sup>6</sup> E ada manuwa sinininila anagiba ikidewedewe-yabudi, ada yadayada seyana seyana, veyavo anatovegugaiyavo ilukuluku tutulagolota nagona wagaine, ke Yaubada anaoduodu anaveimeya tulina tulina igugugaiyedi.†

<sup>7</sup> Aku Tutulagolota anavelu, tainei Tutulagolota Tabutabu-moena, ani tova seya-moena mala-mala seyana seyana veyavo anatovegugai adi-

---

\*\* **9:5** Tova tuwai-moena meIsileli yadi kevakeva ivevebolavoiyedi Yaubada yana veimeya anafaiweya. Ani kevakeva-dina adivebolavoi giveiyaiyaya aimo Yeisu Tauna gina vebolavoiyena keloseya ide kaliva yada dewa koyona faidiya. Faina keke maita anafata bulumakau ke goti dayagidi gagana wagaine kaliva yadi koyona gina vaiyavule, keke-mowa. Au Yeisu, Banae keke maita wa yana dewa koyona ani Bana dayagina wagaine Yaubada yada koyona gina venuwaegedi. (Eba 8:20, Iyeg 3:18, Ibel 7:27, 10:4-7) Ada kaduwe maita moyaidi imiyamiya wagaidiya vona-nai 'vebolavoi' iinanana Buki Tabu wagaine.

\*\* **9:5** Fafali-nai wagaine Yaubada wa yana nuwakalikali kaliva yadi koyona givenuwaegedi ani iinanana buki-nai Iyegemona wagaine. (Iyeg 25:17-22, 30:6, 31:7, 35:12, 37:6-9, 39:35, 40:20)

† **9:5** Iyeg 37:1-29 † **9:6** Naba 18:2-3

tonagona anakai-be-mowa gilukuluku.<sup>†</sup> Ada yana luku-nai wagaine ani keke makagekagena, aku kevakeva ivebolavoiyena dayagina gilukuluwena, e ada nagona tauna yana koyona Yaubada gina venuwaegena, aku muliya gavana kaliva keke ida alamane aku yadi koyona ifaise-wadi ani koyona-dina Yaubada gina venuwaegedi.

<sup>8</sup> Taidei yadi gugai-dina wagaidiya, ani Aluwaluwa Tabuna givevewaleda vaita Tutulagolota Tabutabu-moena analuku ani aimo keke yavuyavuna. Manuwa sinininila anatutulagolota nagona\*\* aimo gimiyamiya wagaine, anatutulagolota anavelu ani anaebaluku giabodana. E ada keke kaliva-kavokavovo adiaawaega inaluku tunutunugina Yaubada matane.<sup>†</sup>

<sup>9</sup> Taidei seyana ebaita ani ide kaliva tova malinai kamiyamiya faideya, faina kaalamanena tayuwe veimeya-nai dibune, tova moyaina tooduodu-dina yadi nuwakabubu ke vebolavoi-dina ivelevelena Yaubada wagaine, nonogana nuwafoudiya yadi koyona anavita aimoina ilulutovonina. Keke anafata vita-nai gina kolayavule-yabu.<sup>†</sup>

---

<sup>†</sup> **9:7** Iyeg 30:10, Vei 16:15,34, Ibel 10:3-4      \*\* **9:8** Manuwa sinininila anatutulagolota nagona giveiyaiyaya Yaubada yana veyavo anawai tuwaina gimiyamiya. Ada veyavo anawai-nai gimiyamiya anatoveya, Tutulagolota Tabutabu-moena ani aimo falifalina kaliva moyaidi faidiya. Kaliva moyaidi keke adiaawaega inana tunutunugina Yaubada matane Tutulagolota Tabutabu-moena wagaine, e aku malamala seyana seyana Yaubada yana veyavo anatovegugai aditonagona seya-moena anaawaega ginaluku kaliva moyaidi faidiya.    <sup>†</sup> **9:8** Ibel 10:19-20    <sup>†</sup> **9:9** Ibel 10:1-4



<sup>10</sup> Ida yadi gugai oduodu faina ani gufa, ke aa, kevakeva, ada towa, ke ikolakola tulina tulina gagana, ani gaitoma-dina wagaidiya kaliva taudiyavo ikikiveyegayegenedi Yaubada matane. Yaubada veimeya-dina gisedi kaliva faidiya ke ina mulimuliyedi analaba Keliso ginaelai, ke Yaubada yana veyavo anawai evaguna anatova gina vevuvuna.

<sup>11</sup> Aku Keliso bademowa giyegemona ada veyavo anatovegugai wagaidiya givetonagona, ke Yaubada yana veyavo anawai evaguna gibubuna. E ada wai-nai anamiya iwakana bademowa kanuwagana. Idedeku babiYa Yaubada yana manuwa tabu wagaine, yana veyavo anatovegugai ilukuluku ifaifaisewa ani kaliva nimadiya ibubuna. Aku Keliso ani keke manuwa-nai wagaine gidaluku, aku Yaubada yana ebamiya iwaka-vagaina gabameya giluku. Tainei ebamiya-nai keke babi taidei anagaitoma aku gabameya gimiyamiya, ada manuwa tabu babiYa gitubusegena ada kaduwe giveiwakasege-moena.

<sup>12</sup> Tova-nai Yeisu giluku wadedeku, keke goti ke bulumakau natudi dayagidi gida lukuwe vebolavoi faina, e aku tova seya-moena tova matatabuna faina Tauna dayagina gilukuwena Tutulagolota Tabutabu-moena wagaine, wadedeku Yaubada matane giluku-vagata. Ada taidei anafaiweya ide yada koyona faina yoyogodeyavo kamiyaamiya ani gitutuveobuda,

gitutuveobu-vagaida.\*\*

<sup>13</sup> Veimeya tuwaina wagaine, goti ke bulumakau kaliva dayagidi† ke bulumakau vevine avudi † ani veyavo anatovegugai ilufuifuyedi badiyavo gavega adigiduwa anaveimeya wagaine gikivebwanenedi Yaubada matane. Badi ikiveyegayeganedi ada vovodi wamelaleya gagana iyegayegana.

<sup>14</sup> E aku Keliso dayagina† ani kevakeva dayagidi giveiwaka sege-moena, faina Banae Aluwaluwa gimiyamiya-vagata wagaine Tauna giawaegena vebolavoi yegayega-moena Yaubada wagaine ke gialika faideya.† Yada dewa koyona fatana alika faina, vita nuwafoudeya kalutovonina, aku Keliso dayagina wagaine tainei vita-nai givaiyavulena, ke nuwafouda gikiveyegayeganena† ayo ide adafaiweya Yaubada miyamiyani-vagaina yana nuwanuwa kana gugugaiyena.

<sup>15</sup> Ide faideya gialika wagaine, Keliso gitutuveobuda yada koyona adimatavuloga wagaidiya-deya, ideyavo-dana veyavo anawai nagona anatoveya Yaubada yana veimeya-dina kayaweyawelidi. E ada keke tamo gaito anafata veyavo anawai tuwaina anavemoimoina wagaine gina yegayegana faina, ada Keliso ani Yaubada ke kaliva gimidigoloida† ke veyavo anawai evaguna gikiveyegemonina. Taidei

---

\*\* **9:12** Vona-nai 'gitutuveobuda' ananuwanuwa ani kaliva moyaida yada dewa koyona faina yogoyogodeyavo kamiyamiya, e aku Yeisu yawaina giawaegena e ada gietoyavuda. (Efes 1:7-8) † **9:13** Vei 16:3,14-16, Naba 19:16-22 † **9:13** Iyeg 30:10 † **9:14** 1Pi 1:18-19, 1Iyo 1:7, Ive 7:14 † **9:14** Ibel 7:27 † **9:14** Ibel 10:22 † **9:15** 1Tim 2:5, Ibel 8:6, 12:24

anafaiweya gigugai e ada ide gavega Yaubada gidouweda,<sup>†</sup> ani adafaiweya kana nuwagana gavana iwakana ke miyamiyani-vagaina givonadabadabayena.

<sup>16-17</sup> Yada dewa seyana ani taidei anafaiweya. Kai tamo gaito ginuwanuwa yana alika faina, aga fefe seyana gina vetokilumina badi gavega givenuwadadanedi kaliva-dina aimo laovina ina vaina ani faidiya. Ada aimo banae yawaina gina avaina ke moyaidi ina alamanena bademowa gialika, e, fefe-nai ina veyawana ada gavaiyamu giveimeya tauna yana laova faine, anafaiweya ina vutugena. Waitana, fefe anavetokiluma ani yana alika muline gaga fefe-nai ina vefaisewana wa anaveimeya toyogina, aku keke banae wayawaina anatoveya.

<sup>18</sup> Taidei faina Yaubada yana veyavo anawai nagona gimadusena ani gikiveyegemonina kevakeva dayagidi wagaine.

<sup>19</sup> Faina tuwai-moena Yaubada yana veyavo anawai nagona gisena anatoveya, Mosese veimeya seyana seyana Veimeya anabuki wagaine imiyamiya ani giifufuyedi meIsileli matatabudi wagaidiya, ada bulumakau kabisodi ke goti dayagidi givaidi ada gufa nodi gilomwanina, ada Veimeya anabuki ke kaliva matatabuna gilufuifuidi. Yana ebalufuifuinai ani ai kabisona ivewagana 'isofa', ani lagana wagaine sifi vutuvutudi yabeyabelina iyogovefosena.

<sup>20</sup> Ada gilufuifuidi aku givonediga, "Ida dayaganai ani Yaubada yana veyavo anawai anadayaga,

---

<sup>†</sup> 9:15 Lom 8:28

ada taidei wagaine veyavo-nai anawai gibubuna. Gaitoma matatabuna givonadabadabayedi wagaimiya gina gugaiyedi, ada imiyavo veimeya-dina givolemi ani wana itaveyabidi.” Taidei anafaiweya Mosese givona.†

<sup>21</sup> Ada kaduwe anafaiweya dayaga wagaine gilufuifuina manuwa sinininila ke giba-dina moyaina ivegugaiyedi vebolavoi wagaine.

<sup>22</sup> E ada dayaga wagaine gaitoma moyaina ikiveyegayeganedi Yaubada matane, Veimeya anabuki givona anafaiweya. Ada koyona analaufata ani alika faina, kai keke dayaga ina kivemadu, aga keke anafata koyona anavenuwaega kada nuwaga Yaubada wagainede-ya.†

*Keliso yana vebolavoi ani kaliva yadi koyona anavaiyavula faina.*

<sup>23</sup> Ada koyona anavenuwaega ani dayaga anakivemadu wagaine faina, gilubodana kevakeva dayagidi wagaine manuwa sinininila anagiba ikiveyegayeganedi, gaitoma-dina yada ebaita Yaubada yana ebamiya gabameya anafaiweya anununa. Aku gaitoma-moedi taudiyavo velemono gabameya ani keke anafata kevakeva dayagina wagaine ina kiveyegayeganedi, aku analauboda vebolavoi iwaka-moena wagaine ina kiveyegayeganedi, tainei Keliso dayagina wagaine.

<sup>24</sup> Faina Keliso keke gidaluku Tutulagolota Tabutabu-moena kaliva nimadiya ibubuna wagaine. Faina wada gaitoma-nai velemono

---

† 9:20 Iyeg 24:6-8, Mad 26:28    † 9:22 Vei 17:11

gabameya anununa. Aku aiyada gabama-moena wagaine Tauna giluku, ada ide faideya Yaubada matane giyegemona.<sup>†</sup>

<sup>25</sup> Veyavo anatovegugai aditonagona ani tova seya-moena malamala seyana seyana wagaine gilukuluku Tutulagolota Tabutabu-moena wagaine, ani keke tauna dayagina aku kevakeva dayagidi gilukulukuwena. Aku Keliso ani keke Tauna gida vebolavoie-vavagile, keke.

<sup>26</sup> Kai Banae malamala seyana seyana Tauna gida vevebolavoiyena, aga tova moyaina gida uloulolo, tova-nai babi anaibubuna vaguvagu wagaine ke analaba malinai. Aku tova seya-moena tova anaebalauyabu wagaine, giyegemona ke koyona gina vaiyavulena Tauna anavebolavoi wagaine.

<sup>27</sup> Tuwai-moena Yaubada veimeya gisena, givona, "Tova seya-moena kaliva ina alika, ada yadi alika muline ani gana vevonayavugidi."

<sup>28</sup> Ada kaduwe anafaiweya, tova seya-moena Keliso Tauna givebolavoiyena ke kaliva moyaida yada koyona giwaidi.<sup>†</sup> Ada ide gavega kaveita-bodaboda Banae faine<sup>†</sup> ani aimo tova anavelu gina yegemona, keke koyona anavaiyavula faina aku aiyada adakibababala faina.

## 10

*Keliso yana vebolavoi seya-moena  
givebolavoiyena ani vebolavoi velugadiyavo  
matatabudi giveiwakasegedi.*

---

<sup>†</sup> **9:24** Lom 8:34, Ibel 7:25, 1Iyo 2:1    <sup>†</sup> **9:28** Ais 53:12, Ibel 10:10, 1Pi 2:24, 3:18    <sup>†</sup> **9:28** Ais 25:9, Fip 3:20, Tai 2:13

<sup>1</sup> Aku malinai gaitoma moyaina iwakadi kanuwanuwagadi Yeisu wagaine-deya, ada kaduwe aimo kana nuwanuwagadi. Aku wada veimeya-dina tuwai-moena Yaubada giveleda Mosese wagaine, ani gaitoma-dina iwakadi adianunu, keke gaitoma-moedi velemoena.<sup>†</sup> Veimeya-dina ani anunu gaga faina, vebolavoi-nai seyana aku iluvavagilena tova moyaina malamala seyana seyana, ani keke-bamowa anafata gina kiveiwakane-yabudi badiyavo iyegeyegemo ina oduodu faina.

<sup>2</sup> Kai tooduodu-dina bademowa ida yegayegana-vagata Yaubada matane, aga keke aimo yadi koyona anavita ida lutovoni nuwafoudiya, e ada vebolavoi bademowa-deya ida ilovena.

<sup>3</sup> Aku malamala seyana seyana taidei vebolavoi-dina wagaidiya inuwaudududi kaliva yadi koyona,

<sup>4</sup> faina keke maita anafata bulumakau ke goti dayagidi ani kaliva yadi koyona gina vaiyavule, keke-mowa.

<sup>5-6</sup> Tainei faina, tova kabisona Keliso gida obuelai babiya, givona Yaubada Tamana wagaine,

“Tova moyaina kaliva kevakeva ialaalai-yabudi ebavebolavoi wagaine,  
ada aa tulina tulina yadi velekaovo ani ialialiyedi wagainiya yadi koyona adi-vaiyavula faina,  
aku Oye keke nuwanuwa.

---

<sup>†</sup> **10:1** Kol 2:17

Ada kaduwe tova moyaina kevakeva ialalai-yabudi  
ebavebolavoi wagaine, ani ivele-kavovo wagainiya  
vaita yadi koyona ina vaiyavuledi,  
aku Oye keke uda vemwamwala faidiya.  
Aku vovo seyana ukidewedewena faikuya  
anafaiweya tomiyababi vovodi,  
Iya ya nuwanuwa gana gugaiyena faina.  
<sup>7</sup> Ada Iya gavonaga, 'O Yaubada,  
Iya idauwe ke ya nuwanuwa gana gugaiyena,  
anafaiweya tuwaina ivetokilumina  
Iya faikuya ya buki uwalugena wagaine.' " †

Taidei anafaiweya Keliso givona.

<sup>8</sup> Nagona givona, "Tova moyaina kaliva kevakeva ivevebolavoiyedi wagainiya ke aa tulina tulina yadi velekaovo ani ialialiyedi wagainiya. Ada kaduwe kevakeva ialaalai-yabudi ebavebolavoi wagaine ani ivelekavovo wagainiya yadi koyona adivaiyavula faina. E aku Oye keke nuwanuwa, ada keke uda vemwamwala faidiya. E aku gaitoma-dina ani Mosese yana veimeya ananuwanuwa anafaiweya."

<sup>9</sup> Ada kaduwe Keliso givona, "Uitana, Iya idauwe ke ya nuwanuwa gana gugaiyena." Taidei wagaine kaalamanena ani, veyavo anawai tuwaina bademowa Yaubada givaiyavulena e ada veyavo anawai evaguna ginasena.

<sup>10</sup> Ada taidei Yaubada yana nuwanuwa-nai wagaine, ide gikivetabuda Yeisu Keliso vovona anavelekavovo wagaine. E ada ide bademowa

---

† 10:7 Sam 40:6-8

koyona wagaine kayegayegana velemono, ada tabutabudeyavo Yaubada matane. Yeisu vovona givolekavovoyena tova seya-moena wagaine, ani tova anamatatabuna faine.†

11 Yadayada seyana seyana wagaine veyavo anatovegugai seyana seyana gimidimididi aku oduodu anagugai gigugugaiyena. Tova ke tova vebolavoi ivebolavoiyena ada kaduwe iluvav-agilena, aku keke vebolavoi-dina adifata koyona ina vaiyavuledi, keke-bamowa.

12 Aku Banae veyavo anatovegugai aditonagona-moena, ani vebolavoi seya-moena givebolavoiyena koyona faidiya, tova anamatatabuna faina. Ada vebolavoi gifaisewana giavaina, givetogana Yaubada aiyatagine,†

13 ada tova tayuwe wagaine-deya giveita-bodaboda analaba nibainavo ageyafayafane Yaubada ginasedi.†

14 Ada au yana vebolavoi seya-moena wagaine, bademowa kaliva gise-vagaidi yegayegadiyavo Yaubada matane ada keke tamu koyona wagaidiya, badi kaliva-dina nuwainagediya gifafaisewa e ada yadi dewa yegayegadi ina seseyegemonedi.

15 Kaduwe Aluwaluwa Tabuna giawavelemoenayena wagaideya, givona,

16 “KAUVEYA givona, Tova tuwaina gina avaina ayo taidei veyavo anawai-nai gana bubuna

---

† 10:10 Ibel 7:27, 9:12 † 10:12 Mak 16:19, Ibel 1:3 † 10:13 Ibel 1:13



yaku kalivayavo wagaidiya, ani taidei anafaiweya.

Yaku veimeya ganasedi aseasediya,  
ada kaduwe gana vetokilumidi yadi  
nuwanuwa wagaidiya.”†

17 Ada kaduwe givona,

“Yadi koyona ada yaku veimeya adiawaegega  
ani keke aimo gana nuvaududu.” †

18 Ada Yaubada kaliva yadi koyona bademowa  
givenuwaegedi faina, keke gida luboda  
kaduwe kevakeva ina vebolavoiyedi ke koyona  
gina vaiyavule. Vebolavoi koyona faidiya ani  
bademowa giavaina.

*Yeisu wana giyavuna faideya e ada  
kana yegemona Yaubada matane.*

19 E ada tubuiyakuweyavo, Yeisu dayagina  
wagaine ide wa yada asevatu adafaiweya  
nodi kanaluku Tutulagolota Tabutabu-moena  
wagaine,† tainei Yaubada matane.

20 Tuwaina Tutulagolota Tabutabu-moena ise-  
babalina nuya wagaine, ada kaliva adiawata  
keke inaluku. Aku malinai, ani yada ebaluku  
evaguna ke miyamiyani-vagina Yaubada bade-  
mowa giyavuna faideya sebabala-nai wagaine,

---

† 10:16 Iyel 31:33    † 10:17 Iyel 31:34    † 10:19 Ibel 4:16

tainei Yeisu vovona wagaine. E ada ide adaawaega kanaluku Yaubada matane.\*\*

<sup>21</sup> Ada kaduwe veyavo anatovegugai adi-tonagona lakaina ani bade wagaideya, Banae Yeisu, ada ideyavo Yaubada yana yoo ani gitaitaveyabida.

<sup>22</sup> E ada kana naunau Yaubada lilivane-mwane. Yeisu bademowa aseaseda gilufuifuidi dayagina wagaine† ke yada koyona anavita kaayaunena nuwafoudeya ani givaiyavulena, ada vovoda gikoladi gufa yegayegana wagaine ke kayegayegana.† E ada wa yada nuwaawaega velemona ke wa yada vetumagana toyogina kanaluku Yaubada matane.

<sup>23</sup> Banae givonadabadaba adakibababala faina, ani wa anavetumagana.† Taidei faina, kanuwavetumaganena gavana givonadabadabayena ani gina veleda, ada yada nuwavetumagana-nai kaawamogatalena. E ada yada awamogatala-nai wagaine keke kana nuwakila aku kana kidonena.†

<sup>24</sup> Ada kaduwe kana nuwanuwayedi gavaiyamu nodi kana vonavona vagadoneda e ada wa yada nuwakabubu nodi kana velemalesa ke gugai iwakadi kana gugugaiyedi.

<sup>25</sup> Tovetumagana tufodi nagona ielaelai tafalolo wagaine ani iilovau. Aku

---

\*\* **10:20** Tova-nai Yeisu vovona giawaegena ke gialika, tainei keteni-nai Tutulagolota Tabutabu-moena anawana gisebabalina ani giakelili-lugena, e ada taidei yada ebaita vaita ide adafaiweya kanaluku Yeisu wagaine-deya ke kananau Yaubada matane. (Mad 27:51) † **10:22** 1Iyo 1:7 † **10:22** Isik 36:25, 1Kol 6:11 † **10:23** 1Kol 1:9 † **10:23** Ibel 4:14

ide keke kana ilova aku tova moyaina kana vagavagauta oduodu faina, ada seyana seyana kana vonavona vagadoneda toyogina Keliso anavetumagana faina. Yada Kauveya yana yewa-vagila anatova givelilivana faina, giluboda-moeda kana vonavagadoneda.

*Yaubada Natuna keke kana vedomobubuse.*

<sup>26</sup> Kai bademowa nuwanuwa velemona anaalamana Keliso faine ani kanuwagana ke kavetumaganena, aku muliya-yo tova moyaina dewa koyona wagaine kaawaawaege-vagaida,<sup>†</sup> aga keke tamo vebolavoi kaduwe gida tufu ayo yada koyona gina vaiyavuledi.

<sup>27</sup> Kai taidei anafaiweya, aga au wa yada matauta lakaina nodi kana veitabodaboda Yaubada yada koyona analaufata gina veleda. Ada yana agouga lakaina vaita aiyabeyabela anafaiweya kana nuwagana, tainei ide gavega Yaubada nibainavo ani faideya, e ada ginaalai-yabuda.

<sup>28</sup> Tuwaina kai tamo gaito Mosese yana veimeya givegaitoma-kavokavovoyena, ada kai anatoitanuwaga adiselu o kai aditoto ina iawatalatalainena, aga kaliva-dina ina nogalina ani keke wa yadi nuwakalikali aku au kaliva-nai ina luvealikana.<sup>†</sup>

<sup>29</sup> Tainei kaliva-nai Mosese yana veimeya giyawelina ani analaufata koyo-moena. Aku gavaiyamu unuwanuwa? Badi gavega kibababala anawai ivedomobubusena ke Yaubada Natuna ivatuvehavebabina, gavaiyamu badi adimatavuloga? Yeisu dayagina Yaubada

<sup>†</sup> 10:26 2Pi 2:20    <sup>†</sup> 10:28 2Vei 17:6

yana veyavo anawai evaguna wagaine†  
 ani gikiveyegayeganeda Yaubada matane,  
 e aku kai tovetumagana tufodi ivegaitoma-  
 kavokavovoyena, aga gavaiyamu? Kaduwe, tova  
 moyaina Aluwaluwa Tabuna wa yana nuwadoga  
 ani ide gilemelemeda, e aku kai tovetumagana  
 tufodi au iawadamanena, aga gavaiyamu?  
 Wana nuwenuwena. Velemoena adilauboda ani  
 adimatavuloga lakai-moena ina nuwagana.

<sup>30</sup> Faina Yaubada kaalamanena, Banae givona,

“Laufata ani Iya akuveimeya.

Iya Tauku kaliva yadi dewa koyona  
 gana lufata.”†

Kaduwe givona,

“Iya KAUVEYA yaku kaliva  
 gana vevonayavugidi  
 ke yadi koyona adilaufata anafaiweya adi-  
 matavuloga ina nuwagana.” †

<sup>31</sup> Ada kai Yaubada Banae miyamiyani-vagaina  
 nimane adamatavuloga kana nuwagana, aga  
 tainei ebamatauta-mowa!

<sup>32</sup> Aku wana nuwaududuna tayuwe tova nagona  
 wagaine gavadi gavadi iyegemona wagaimiya.  
 Yeisu anaalamana faina nuwami gimalina e ayo  
 uloulolo tulina tulina wanuwanuwagadi, aku  
 anavediwe wagaine waatuvefaila ke wavetoyo-  
 gina.

---

† 10:29 Mad 26:27-28 † 10:30 2Vei 32:35, Lom 12:19 † 10:30  
 2Vei 32:36

33 Tamo tova yoo matadiya iawavekoyoyemi ada ikiveuloulolonimi, kaduwe tamo tova badi vita-dina inuwagadi ani wakwayabudi.

34 Tufodi Yeisu ivetumaganena faina deliya isedi, ani wanuwavitavaisedi.† Ada tova-nai tokivekoyo iela yami lokoloko matatabuna ivaidi inauwedi, ani keke wada nuwakoyo aku wa yami vemwamwala wavona, “Ide yada gaitoma idedeku-deya ani iavavaina, aku gavana Yaubada givonadabadabayedi ani bademowa giveleda, ada taidei iwaka-vagaidi ke imiyamiyani-vagaidi.” †

35 Taidei faina yami asevatu keke wana segesege aku au wana asevatu-mowa. Yami asevatu ani gaitoma lakaina Yaubada matane, ada analaufata lakai-moena wagaine gina fatami.

36 Gilubodami wana atuvefaila-mowa e ada Yaubada yana nuwanuwa wana idibumwaigena,† ke gavana givonadabadabayena ani wana nuwagana.

37 Wa yami atuvefaila wana miyamiya, faina Yaubada yana Buki wagaine givonaga,

“Tova kabiso-moena Banae gielaelai ani ginaelai.

Keke gina iwagewagege.

38 Aku yaku kaliva yegayegadiyavo matakuya

ani yadi vetumagana wagaine ina miyamiya.†

Aku kai kaliva wa yana matauta

---

† 10:34 Mad 25:36, 2Tim 1:16, Ibel 13:3 † 10:34 Mad 6:20

† 10:36 Mad 10:22, Luk 21:19, Lom 12:12, Ibel 6:11-12 † 10:38 Abak 2:3-4, Lom 1:17

yana vetumagana gina sewavuyena ke  
gina nuwayewa,  
aga keke gana vemwamwala banae faine.”

Taidei anafaiweya Yaubada givona.

<sup>39</sup> Aku ideyavo ani keke kadadewa anafaiweya badi gavega yadi vetumagana wagaine ivemulitugutugu ke inuwayewa e ada agolaufofolo ina nuwagana. Velemoena ide yada vetumagana kasevelavelalaina ke adakibababala kanuwanuwagana.

## 11

### *Vetumagana faina.*

<sup>1</sup> E ada gavana vetumagana? Vetumagana anaalamana taidei anafaiweya. Gaitoma-dina faidiya kanuwavetumagana kana nuwagadi, ani adivelemoena bademowa imiyamiya. Ada kaduwe gavana gavana imiyamiya aku keke adafaiweya kana itadi, ani yada vetumagana wagaine adafaiweya kana alamanena velemoena imiyamiya.† Tainei kavewagana ‘vetumagana’.

<sup>2</sup> Tova tuwaina anayoo ani yadi vetumagana Yaubada wagaine isevelavelalaina faina, giawaveiwakanedi.

<sup>3</sup> Yada vetumagana wagaine nuwada gimalina vaita Yaubada yana vona gaga aku babi ada gabama iyegemo, e ada gavana keke kada itaita ani wagaidiya gibubudi gavana malinai kaitaitadi.†

---

† 11:1 2Kol 4:18, 5:7, 1Pi 1:8 † 11:3 Eba 1:1, Lom 4:17

*Kaliva-dina wa yadi vetumagana ani yada ebaita e ada yadi vetumagana kada gaveuveulena.*

<sup>4</sup> Tova tuwai-moena Ebeli Yaubada givetumaganena, e ada yana vetumagana wagaine yana vebolavoi Yaubada wagaine iwaka-vagaina ayo Keni yana vebolavoi. Yaubada givemwamwala Ebeli yana vebolavoi givelena wagaine, e ada givewagana banae kaliva yegayegana. Ada Ebeli bademowa gialika, aku yana vetumagana ifuifufuna ani vaita aimo gida ifuifufu wagaideya.†

<sup>5</sup> Kaduwe seyana ani Inoki, banae tova moyaina Yaubada nodi ivevetubuiyana ada Yaubada giawaveiwakanena givona, “Iya gavemwamwala Inoki faine.” Ada yana vetumagana wagaine Inoki wayawaina ani Yaubada givai ginauwena gabameya Tauna wagaine, e ada alika keke gida lutovoni. Ada kaliva ilele-wayogena, keke ida nuwaga.†

<sup>6</sup> Ada kai keke wa yada vetumagana, aga keke anafata Yaubada gina vemwamwala faideya. Aku kai gaito seyana nuwanuwana veoveola wagaine gina nuyegemona Yaubada matane, aga gilubodana gina vetumagana vaita Yaubada gimiyamiya,† ada kaduwe gina vetumagana vaita badi gavega ilelelena velemono ina alamanena faina, ani Banae gina fatadi iwakana ke gina lemedi e ada ina alamanena.

<sup>7</sup> Kaduwe kaliva seyana anayegana Nowa, banae yana vetumagana wagaine aki giyogona.† Tova-nai Yaubada givonamatawena gavana aimo

---

† 11:4 Eba 4:3-8, 1Iyo 3:12    † 11:5 Eba 5:22-24    † 11:6 1Awa 28:9, Iyel 29:12-14, Iyo 4:24    † 11:7 Eba 6:13-22, Luk 17:26

gina yegemona faina, yana vona givemoimoinena ada aki-nai giyogona ke yana gabu nodi adik-ibababala ina nuwagana.\*\* E ada Nowa yana vetumagana wagaine, babi matatabuna anakali-vayavo yadi nuwanuwa koyona giseyegemomena, e ada mamalina vaita adilauboda-mowa Yaubada gina vematavulogidi. Aku Nowa yana vetumagana-nai faina, Yaubada givona, "Nowa bana gasena yegayegana matakuya." †

*Ebelaamo yana vetumagana ifuifufuna.*

<sup>8</sup> Kaduwe anafaiweya Ebelaamo. Yana vetumagana wagaine, Yaubada givenogalena tova-nai gidouwena ke yana fafali ebatubugina gina segena aku ginanau fafali-nai wagaine Yaubada givonadabadabayena aimo gina vena. E ada Ebelaamo wa yana vemoimoina gimatawalewale ke gitauya, aku gadedeku ginaunau ani keke gida alamane aku au ginau.†

<sup>9</sup> Wa yana vetumagana babi-nai Yaubada givonadabadabayena, ani wagaine giveawawala anafaiweya malifafali wagaine. Keke manawa velemona gidayogo aku manawa sinininila wagaine ginumiyamiyanau. Kaduwe anafaiweya, natuna Aisake ke tubuna Iyakobo manawa sinininila wagaidiya imiya, ada aimoyo Yaubada yana vonadabadaba babi-nai faine giluvagilena adiselu wagaidiya, babi tayuwe aimo gina veledi.

---

\*\* **11:7** Tayuwe tova-nai wagaine aimo keke wei o kai tuwa ida yegemo babi matatabuna wagaine. Ada Nowa keke gida itadi aku auwe Yaubada givetumaganena ke aki-nai giyogona. (Eba 6:13-22) † **11:7** Lom 4:13 † **11:8** Eba 12:1-7, Gug 7:2-4



10 Ebelaamo ginumiyamiyanau ke manuwa sinininila wagaidiya gimiyamiya, faina giitaita-bodana melala-nai wa anaavutuwa velemonoena,<sup>†</sup> melala-nai ani gabameya Yaubada bademowa giyogona Tauna yana nuwanuwa anafaiweya.<sup>†</sup>

11 Kaduwe vetumaganeya, Ebelaamo vavinenena Sela auwe kakalina ada givevavine nonogana Yaubada yana toyogina ginuwagana ke gina veifuga. Ebelaamo givetama, faina banae wa vavinena nodi Yaubada yana vonadabadaba vaita yana gabu ina vemoyai ani ivetumaganena. Faina Yaubada ani vona velemonoena, gavana ginavona, anafaiweya gina gugaiyena.

12 E ada au Sela giveifuga. Moganedi Ebelaamo givekaliva ada keke anafata tamo kwamana gina vetubu.<sup>†</sup> Givekaliva e aku bana wagaine yana tubudelideli moyai-vagaidi iyege-mona. Adiyoo keke adafaiweya kana veyawadi, vaita ailabama gabameya o kai taliya anamakama anafaiweya.<sup>†</sup>

13 Taidei kaliva-dina gaifufuyedi, ani matatabudi aimo yadi vetumagana wagaine imiyamiya aku ialika. Aimo wayawaidi anatoveya, gaitoma-dina Yaubada givonadabadabayedi gina veledi ani keke ida nuwagadi, aku vaita iitaitaidi e ada ivetumagananena aimo ina yegemona, e ada ivesiule Yaubada wagaine faidiya. Ada ivonavona vaita badi iveawawala ke inumiyamiyanau babi taidei wagaine.

14 Badi gavega taidei anafaiweya ivonavona,

<sup>†</sup> 11:10 Ive 21:14    <sup>†</sup> 11:10 Ive 21:2,10    <sup>†</sup> 11:12 Lom 4:16-22

<sup>†</sup> 11:12 Eba 15:5, 22:17, 32:12

ani taudiyavo iawayegeyegemonedi vaita biyavodina yadi fafali velemonoena iveitabodebodena.

<sup>15</sup> Aku kai ida nuwayewa yadi fafali imadusegena faine, aga adifaiweya meyameyagani-moena idayewa fafali-nai wagaine.

<sup>16</sup> Aku velemonoena yadi nuwanuwa isevelavelalaina fafali iwaka-moena faine, tainei fafalinai ani gabameya. Taidei faina Yaubada badi faidiya ani keke gida vovomumu, aku au givona, “Iya yadi Yaubada.” Ee, ide kaalamanena keke gida vovomumu faidiya, faina bademowa melala lakaina gabameya gikidewedewena faidiya.<sup>†</sup>

<sup>17-18</sup> Bana Ebelaamo yana vetumagana wagaine, natuna tubueyana Aisake keke gida nuwalolone aku giawaegena Yaubada wagaine. Nagona Ebelaamo wagaine Yaubada givonadabadaba, givona, “Natu Aisake anakaiibe gagana wagaine ya tubudelideli ayegana ina waiwaina.” <sup>†</sup> E aku muliya-yo Yaubada Ebelaamo giguvaluvana ke gina alamanena velemonoena kai bonana gina venogalena o kai keke, ada givona, “Natu Aisake una vebolavoiyena wagaikuya.” <sup>†</sup> Taidei anafaiweya Yaubada givonena, ada Ebelaamo wa yana vetumagana natuna Aisake keke gida nuwalolone, aku giawaegena Yaubada wagaine ke gikidewadewa natuna gida vebolavoiyena. Ebelaamo Yaubada yana vonadabadaba bademowa ginuwagana nonogana natuna tubueyana gida vebolavoiyena.

<sup>19</sup> Faina nuwainagene givona, “Kai natuku

<sup>†</sup> **11:16** Mad 25:34   <sup>†</sup> **11:17-18** Eba 21:12   <sup>†</sup> **11:17-18** Eba 22:1-19

bademowa alialikana, aga Yaubada anafata gina siveyawana.” Ada natuna gida luvealikana aku Yaubada giawatana, e ada kai kadavona vaita Ebelaamo Aisake ginuwaga-vagilena alika wagaine-deya.

<sup>20</sup> Kaduwe Aisake yana vetumagana wagaine, natunavo Iyakobo ke Iso giawanuwakabubuyedi yadi miya tova matadiya faine.<sup>†</sup> Aisake Yaubada givetumaganena vaita yana awanuwakabubudina aimo gina kiveyegemonidi.

<sup>21</sup> Vetumaganeya, Iyakobo yana alika liliwane Iyosefa natunavo seyana seyana giawanuwakabubuyedi,<sup>†</sup> giluveyabina yana aiwala tabona wagaine aku gioduodu Yaubada wagaine.

<sup>22</sup> Ada Iyosefa yana vetumaganeya, yana alika anatova givelilivana wagaine au yana yoo meIsileli givonedi aimoina Yaubada gina yegemonedi fafali Itipita wagaine-deya, givona, “Aimo tova-nai wana tauya wananau babi-nai Yaubada givonadabadabayena wagaideya, aga luluku wanavai wana nauwedi Kenani wadedeku wana tavudi.” <sup>†</sup>

<sup>23</sup> Kaduwe Mosese inana ke tamana wa yadi vetumagana. Yadi tova wagaine, Itipita anakini giveimeya ke bebeta kaliva matatabudi ina luvealikadi.<sup>†</sup> Aku tova-nai natudi Mosese gitubuga, ialamanena kwamana-nai Yaubada givedi ani keke kwamana kavovona, e ada kini yana veimeya keke ida matause. Ivetumagana

---

<sup>†</sup> **11:20** Eba 27:27-29,39,40    <sup>†</sup> **11:21** Eba 48:16,20    <sup>†</sup> **11:22** Eba 50:24-25, Iyeg 13:19    <sup>†</sup> **11:23** Iyeg 1:15-16,22

vaita Yaubada gina kibababalena, e ada yadi manuweya isewavuyena vaikoi toiye wagaidiya.†

24-25 Muliya-yo Itipita anakini natuna vavine ani Mosese ginuwagana, ada givai ginauwena yana manuweya ke gifayayena. E ada Mosese gitubulakata wa yana veimeya ada kaikaiwabuna, faina banae vaita kini tubuna anafaiweya. Aku bana Mosese Yaubada givetumaganena. Gialamanena kai tauna kwana Itipita anafaiweya gina miyamiya, aga biyavo-dina yadi dewa koyodi ani tauna nuwana ginavai-vagaina, wada miya-nai ani anavemwamwala keke tova manamanawena aku ginamadu avaina. Aiyada givenuwadadana ke tauna giawaegena ke gina uloulolo-tamwata tubuiyanavo anafaiweya, badi Yaubada yana kalivayavo ifaifaisewa keke wa fatadi meItipita faidiya.

26 Mosese ginuwanuwa vaita kai kaliva ina awavekoyoyena o kai ina awaveleigena faina Mesaiya givetumaganena,† aga wai-nai ani iwaka-moena ayo kai Itipita anakaikaiwabu wagaine gida miyamiya. Taidei anafaiweya ginuwanuwa faina, giitaitaboda tova gielaelai aimo gina nuwagana fata miyamiyani-vagaina Yaubada wagaine.

27 Vetumagana wagaine Mosese keke kini yana nuwakoyo gida matause aku Itipita gi-madusegena.† Yana vetumagana-nai wagaine, matana gise-vagaina Yaubada wagaine ke vaita giitaitana, Banae-nai keke adafaiweya kanaita.†

† 11:23 Iyeg 2:2-3, Gug 7:20    † 11:26 Ibel 13:13    † 11:27 Iyeg 12:37,51, 13:17    † 11:27 1Tim 1:17

E ada wa yana atuvefaila gimididi toyogina.

<sup>28</sup> Wa yana vetumagana, Yaubada yana veimeya Nugulina faina gidibumwaigena, ada meIsileli givonedi ke sifi kabisodi iluvealikadi ke dayagidi wagaine yadi edawana iluababadi. Taidei anafaiweya gidewena e ada tova-nai anelose-nai alika gialiyena, ani ginaelai ke iyaiyaya-dina gina itadi, ani keke manuwa-dina wagaidiya ginaluku yadi tomoingona gina luvealikadi anafaiweya meItipita yadi tomoingona gina luvealikadi.<sup>†</sup>

<sup>29</sup> Kaduwe meIsileli ivetumaganena Yaubada faina, Leyaga Yabeyabelina idamanina babi ayayana wagaine. Tova-nai Itipita isegena aku inaunau aku meItipita imadunenegadi. Ada meIsileli yadi ota wagaine Leyaga Yabeyabelina wagaine iyegemona, ada Yaubada yana vona wagaine leyaga giawaina, fafaline fafaline gimididi aku meIsileli idamana babi ayayana wagaine. Aku meItipita igaluvaluva ina damana, ani leyaga giiwatavudi, ada matatabu-moedi ikamomola ke ialika.<sup>†</sup>

<sup>30</sup> Kaduwe meIsileli yadi vetumagana wagaine, melala Yeliko anakali lakai-moena ibalabalawalilivugina yadayada seveni wagaidiya. Ada yadayada-nai anaveseveni wagaine ibalabalawalilivugina, ani kali giayaweyaweli gibeu.<sup>†</sup>

<sup>31</sup> Kaduwe vine Yeliko badi tosedada adiyegana Leyabi ani yadi vetumagana faina, keke ida luvealikadi. Faina badi meIsileli toitavagivagiya wa mwamwalidi isivaivaidi

---

<sup>†</sup> **11:28** Iyeg 12:21-32    <sup>†</sup> **11:29** Iyeg 14:21-31    <sup>†</sup> **11:30** Iyos 6:12-21

inauwedi yadi manuweya. Badi vavine-dina Yaubada ivetumaganena faina, melala-nai analuyaweyawela wagaine keke ida luvealikadi, aku badi gavega Yaubada yana veimeya idibusoyogena ani iluvealika-yabudi.†

<sup>32</sup> Toveumagana moyaidi aku auwe idogame-dina. Tova keke anafata tovetumagana kaduwe gana ifuifufuyedi, anafaiweya Gidiyoni,† Balaki,† Samusoni,† Iyefeta,† ada kaduwe Deivida,† Samuwela,† ke falofitayavo.

<sup>33</sup> Badi yadi vetumagana faina, ehaveimeya aditoveimeyayavo ilugaviyadi ke itoyogisegedi, nuwanuwa tunutunugina wagaine yadi yoo iveimeyedi, ke kaliva adivita ikivetunu-dewedewedi e ada yadi veiwaka inuwagana. Ada gavana Yaubada givonadabadabayena gina veledi ani inuwagana. Ada kevakeva laiyni iela vaita ida kanidi, aku Yaubada awadi gikibodana.†

<sup>34</sup> Tufodi yadi vetumagana faina, aiyabeyabela toyogi-vagaina wagaine ibatugedi aku Yaubada aiyabeyabela-nai anatoyogina gikivetuluna,† tufodi nibaidiyavo ielai ke yadi benisi wagaine ida luyavuledi aku Yaubada giyavadi, tufodi kabekabebediyavo aku toyogina Yaubada giveledi, tufodi gaviya wagaine ivetoyogi-moena ke mali yoo yadi tolugaviyayavo itoyogisegedi.

<sup>35</sup> Vevine tufodi yadi vetumagana faina, yadi

---

† **11:31** Iyos 2:1-21, 6:25 † **11:32** Tovei 6:1 - 8:35 † **11:32** Tovei 4:6 - 5:31 † **11:32** Tovei 13:24 - 16:31 † **11:32** Tovei 11:1 - 12:7  
† **11:32** 1Sam 16:1,13 † **11:32** 1Sam 1:20 † **11:33** Tovei 14:6,  
Dan 6:16-22 † **11:34** Dan 3:23-27

toalika iyawa-vagila.† Aku kaliva tufodi yadi vetumagana faina, nibaidiyavo iagouga ke vovodi ikiveuloulolonidi lakaina ada ivonediga, “Kai Yaubada wana vedomobubusena aga ana etoyavumi.”

Aku badi ivonaga, “Keke-mowa Yaubada ana vedomobubuse. Kai wana luvealikama aga aimo anayawa-vagila ke Yaubada nodi anamiya iwakana.” Ada au nibaidiyavo ikiveuloulolonidi-deeya, ialika.

<sup>36</sup> Ada tufodi Yaubada wagaine ivetumagana faina, nibaidiyavo iawaveleigedi ke bulava wagaine ilubibiwalidi, kaduwe tufodi ani isedi deliya ke waseinidi imiyamiya.†

<sup>37</sup> Tufodi yadi vetumagana faina kabala wagaine itutuvealikadi,† tufodi vovodi soweli wagaine isowalugedi, kaduwe tufodi benisi wagaine iluvealikadi,† tufodi adinuya keke faina sifi ke goti bubudi iosedi ke imiyamiyadadana, adiga keke, lokoloko keke, ebamiya keke, keke tamoyadi veiwa. Ada au tova moyaina nibaidiyavo ikiveuloulolonidi ke idewadewa koyona wagaidiya.

<sup>38</sup> Biyavo-dina wa adiuloulolo aku au yadi vetumagana toyogina faina, iwaka-vagaidi Yaubada matane. Yadi iwakana lakai-vagaina ayo tomiyababi moyaidi. Nibaidiyavo iwavidi e ada imiyadadana fafali kavovona ke oya wagaidiya, ada luwa ke watu wagaidiya

---

† 11:35 1Kin 17:17-24, 2Kin 4:18-37 † 11:36 Eba 39:20, Iyel 20:2, 37:15-16 † 11:37 1Kin 21:13, 2Awa 24:21 † 11:37 1Kin 19:10, Iyel 26:23

ivemanuwa.†

<sup>39</sup> Ada biyavo-dina matatabudi yadi vetumagana faina ani Yaubada giawaveiwakanedi, aku keke ida nuwaga gavana givonadabadabayena.

<sup>40</sup> Gavaiyamu-yo keke ida nuwaga? Tuwai-vagaina Yaubada ginuwanuwa kaduwe ide faideya ke yana nuwanuwa iwakamoena gimadu venuwadadanena, tainei badi adikiveiwakana-vagata keke ina madunuwaga aku ina bodaboda, e ada badiyavo ke ideyavo moyaida tova seyana wagaine gina lumatatabuyeda adakiveiwakana-vagata faina.

## 12

*Matada kanase-vagaina Yeisu wagaine, Banae yada vetumagana anatovevuvu.*

<sup>1</sup> E ada ide gavaiyamu? Kaliva-dina wa yadi vetumagana kaifuifufuyedi ani adiyoo lakaina imiyafifida vaita buibui anafaiweya, ada yadi vetumagana ebaita kaitaitana. Taidei faina, gava nuwanuwa ikikivevitada ada koyona isifatufatuma ida ani gilubodana kadavai kada segedi, aku wa yada atuvefaila kadamadu yada vemadu-nai anawai wagaine Yaubada gisena matadeya.†

<sup>2</sup> Taidei anafaiweya kana naunau aku matada kanase-vagaina Yeisu wagaine, Banae yada vetumagana anatovevuvu ada kaduwe anatoibodewadewa. Banae yana tova alika wagaine ginuwanuwa vemwamwala-nai aimo gina nuwagana, e ada anauloulolo gilutovonina

---

† 11:38 1Sam 22:1, 1Kin 18:4, 19:9    † 12:1 1Kol 9:24-27



kelose wagaine ani giatuvefailena,<sup>†</sup> ada yana vovomumu lakaina<sup>†</sup> nonogana givegaitoma-kavokavovoyena. E ada givetogana Yaubada yana veimeya anaebavetoga kaikaiwabuna aiyatagine gimiyamiya, ivi-nai wa anavemoimoina lakaina wagaine.

*Ide Yaubada natunavo ani wa yana nuwak-abubu gikivetunutunugida.*

<sup>3</sup> Wana madumadu vemadu-nai anawai wagaine Yaubada gisena matamiya aku Yeisu wanaduna. Tokoyona wa yadi agouga uloulolo vita-moedi Banae ivelena, aku au giatuvefailedi.<sup>†</sup> Taidei faina kai uloulolo wana nuwagana Banae anayegana faina, aga yana atuvefaila wana nuwenuwena e ada keke wana kabekabebe ke yami asevatu ginaavai.<sup>†</sup>

<sup>4</sup> Imiyavo wavetoefaefa ke koyona wana toyogisegena, aku koyona keke wada veluege lakai-moena e ada dayagimi gidamadu Yeisu anafaiweya.

<sup>5</sup> Ada Yaubada yana vona wagaine gikive asevatuda ani anaita kai nuwami givulu, givonayena natunavo wagaimiya, givonaga,

“Natuku, kai unadewa koyona  
ada ya KAUYEYA gina kivetunugini,  
aga keke una vegaitoma-kavokavovoye aku  
una nuwanuwayena.<sup>†</sup>  
Ada tova-nai gina kivetuvetununi,

---

<sup>†</sup> **12:2** Luk 24:26    <sup>†</sup> **12:2** Sam 22:6-7, 69:19, Ais 53:3-4    <sup>†</sup> **12:3** Mad 27:28-44    <sup>†</sup> **12:3** Gal 6:9    <sup>†</sup> **12:5** Iyob 5:17

keke ya asevatu ginaavai yana vona-dina faidiya.

<sup>6</sup> Faina badi gavega KAUYEYA ginuwak-abubuyedi ani gikivetuvetunugidi, ada badi gavega giawavenatunedi ani give-matavulogidi.” †

<sup>7</sup> E ada tova-nai Yaubada yana kivetunuga wana nuwanuwagana, aga wana nuwaududuna ina Yaubada wa yana nuwakabubu yami dewa gikivetuvetunugidi. Imiyavo Banae natunavo faina, taidei anafaiweya gidewedewemi. Imi tama moyaimi ani kai natumiyavo inadewa koyona, aga wana kivetuvetunugidi ke yadi dewa gina tunutunugina.

<sup>8</sup> Yaubada natunavo moyaida gikivetuvetunugida ke yada dewa moyaidi ina tunutunugina.† E ada kai keke yana kivetuvetunu wada nuwaga, aga imi keke natunavo velemono aku au vaita edanatunavo.

<sup>9</sup> Kaduwe, tamadeyavo ani kaliva-mowa nonogana ikivetuvetunugida aku kavemoimoinedi. E aku Banae Tamada aluwaluwada vuvuna ani, velemono adalauboda wa yada vemoimoina lakaina taudeyavo kana seda yana veimeya dibune, e ada kana miyamiya iwakana.

<sup>10</sup> Faina tamadeyavo babiya yada tova biyabiyama wagaidiya ikivetuvetunuda gavaiyamu ikivemwamwalidi anafaiweya, aku Tamada gabameya, ani yada vei waka faina gikivetuvetunuda e ada ideyavo ani

---

† **12:6** Vona 3:11-12, Sam 94:12, 119:67,75, Ive 3:19    † **12:8** 2Vei 8:5-6

tabutabudeyavo kana miyamiya anafaiweya Banae tabutabuna.

<sup>11</sup> Gavatoveya kivetuvetunu kanuwanuwagadi, ani adalutovona keke vaita ina ebavemwamwala, aku aiyada vaita uloulolo kanuwanuwagana. Aku kai keke kana nuwakoyo faina aku taudeyavo kana awaegeda adakivetuvetunuga wagaidiya, aga aimoina wa yada nuwaniwalova guwana nuwanuwa yegayegana kana seyegemonena yada dewa wagaine.

<sup>12</sup> Gaalamanena imi tufomi yami awaega Keliso wagaine, ani anafaiweya vaita onami vitana wawaiwai walakalaka oyeya e ada nimami iavukavukadi ke agemi ikabekabebena. Aku yami vetumagana wana kidonena.†

<sup>13</sup> Ada yamina Yaubada yana wai wagaine wana kivemeyameyaganina, vaita wai iwakana ke tunutunugina wagaine wana naunau.† Keke nuwanuwada vovoda talaina tamo ginakoyo e ada yada nau-nai kana ilove, keke. Au ageda felafelana ina toyogina ke yadana ina vefatafata.†

*Vona matawa Yaubada anadibusoyoga faina.*

<sup>14</sup> Tova moyaina wana galuvaluva ke kaliva moyaidi nodi kukuya wagaine wanamiya.† Ada kaduwe nuwami wana sevelavelalaina ke tau-miyavo wana seseliyemi Yaubada wagaine e ada Aluwaluwa Tabuna gina nagonagoyemi. Taidei wagaine imi tabutabumiyavo Yaubada matane.† Kai keke anafaiweya wada miyami, aga kadu keke Kauveya adaToveimeya wanaita.

† 12:12 Ais 35:3 † 12:13 Vona 4:26-27 † 12:13 Iyem 5:16

† 12:14 Lom 12:18, 14:19 † 12:14 1Tes 4:7

15 Wana itaveyabimi e ada keke seyana gaito wagaimiya yana dewa faina Yaubada yana nuwadoga-nai keke gina vaivai.† Ee, wana itaveyabimi aenanai seyana gaito wagaimiya-deya gina nuwakoyo, ada yana nuwakoyo gina nauwena-deya gina vegolagola. Anafaiweya ai gitubutubuga walamina wagaine-deya, banae yana nuwakoyo gina tubuga lakaina ke vaita walamina golagolana bana yana nuwanuwa wagaine, e ada gina vegilili yawaina wagaine ke banae ina vewagana 'nuwakoyo golagola tauna'.† Ada kai imi keke wana itaveyabimi, aga yana golagolana wagaine moyaimi gina ivekoyomi, ke yami nuwanuwa yegayegana ani gina kivebwanenedi.

16 Wana itaveyabimi aenanai gaito tamo wagaimiya-deya vovona gina awaege kavokavovo dewa koyona wagaine.† Kaduwe wana itaveyabimi ada keke tamo gaito wagaimiya-deya Yaubada ke gavana tabutabuna gina vegaitoma-kavokavovoye, anafaiweya Iso. Banae aa kabiso-moena faine, vetomoinagona anavutuga gikimone vedamana. E ada Yaubada yana vonadabadaba guwana tamana wagaine keke gida nuwaga. Yaubada yana nuwanuwa keke gida nuwenuwe, aku mafa lavuga ginuwenuwena.†

17 Bana faine bademowa waalamanena, muliya-yo nuwanuwana tamana gida awanuwakabubuyena ani tamana givonena, givona, "Auwe." Ada wa tagigina

† 12:15 2Kol 6:1 † 12:15 2Vei 29:18, Efes 4:31 † 12:16 Ibel 13:4

† 12:16 Eba 25:29-34

tamana giveolena vaita yana nuwanuwa gida sivedavedamana, aku keke.<sup>†</sup>

18 Aku imi yami nuyegemo Yaubada wagaine, ani keke anafaiweya tuwai-moena tamadeyavo nagona meIsileli. Biyavo-dina inuyegemona Oya Sainai aku Yaubada keke gida awaegedi ina kiluvaluva, ada aiyabeyabela lakaina siyona gilakalaka ani iitana, kaduwe yuyuvana bakibaki giyegemona, ke kaduwe yagiyowa Oya-nai giki-wafina ada mala lakaina gimadu, atunama ke atala gilavuga.

19-20 Ada kaduwe inogalina gaitoma seyana ananogala vaita kaula anafaiweya. Ada Yaubada yana veimeya toyogina gisena, givonaga, “Keke tamo gaito ginavaga oya taidei awaawatana wagaine. Kai auwe kevakeva aku ginanau oya vuvune, kevakeva-nai kabala wagaine ina tutuvealikana.” Ada Banae yana veimeya-nai inogalina wagaine, iasekolukolu ada Mosese iveolena, ivonenaga, “Keke nuwanuwama kaduwe Yaubada bonana ana nogali-vagile.” <sup>†</sup>

21 Oya-nai anaita ebamatauta velemoena. Ada taidei faina Mosese tauna givona, “Fafalinai givebimatamatauta-mowa, ada gamatauta lakaina ke gagavetavetatava.”

22 Aku imiyavo veyavo anawai evaguna anaveimeya dibune wamiyamiya, ani yami nuyegemo Yaubada wagaine keke wadana Oya Sainai wagaine, aiyada velemoena imi yami vetumagana wagaine ada wanuyegemona Oya

---

<sup>†</sup> 12:17 Eba 27:32-40    <sup>†</sup> 12:19-20 Iyeg 19:12-13,16-20, 20:18-21, 2Vei 4:11, 5:22

Saiyoni wagaine, tainei Yaubada miyamiyani-vagaina yana melala lakaina ani gabama anaYelusalema.† Ada wadedeku aneloseyavo adiyoo lakai-moena keke adafaiweya kana veyawadi, ani wa yadi vemwamwala nodi ivagavagauta.†

<sup>23</sup> Kaduwe wadedeku ani Yaubada natunavo tomainagona yadi miyavagauta, yadi ekalesiya, badiyavo Keliso yana gabuyavo ke adiyegana Yaubada givetokilumina gabama anabuki wagaine.† Kaduwe imi wanuyegemona Yaubada wagaine, Banae kaliva matatabuda adatovevonayavuga, ada badi kaliva-dina yegayegadiyavo ialika ke aluwaluwadi gabameya Yaubada gikiveyegayegane-yabudi.

<sup>24</sup> Ada kaduwe wanuyegemona Yeisu wagaine, Banae Yaubada ke ideyavo gimidigoloida e ada yada veyavo Yaubada nodi ani dayagina-nai ani veyavo anawai anaiyaiyaya.† Dayaga-nai ilu-fuifuina† wagaine yada koyona anavenuwaega kanuwagana, ada taidei ananuwanuwa iwakamoena ayo Ebeli dayagina givedovedou babi wagaine anamiwayaudi faina.†

<sup>25</sup> Tova malinai Yaubada giifuifufu wagaideya, e ada wana itaveyabimi ada keke bonana wana dibusoyoge. Tuwai-moena meIsileli Yaubada bonana inogalina Oya Sainai wagaine idedeku babiwa aku yana veimeya idibusoyogena, ada keke adifaiweya adimatavuloga inaose. Aku ideyavo ani

---

† 12:22 Ibe 14:1, 21:2 † 12:22 Ibe 5:11-12 † 12:23 Luk 10:20, Fip 4:3 † 12:24 Ibel 8:6 † 12:24 Ibel 10:22 † 12:24 Eba 4:10

Yeisu Keliso gabameya gimiyamiya, ani Yaubada valeyana giifuifufuyena wagaideya. Kai kana vedomobubusena, aga keke adafata adamatavuloga wagaine kanaota, keke-mowa.<sup>†</sup>

<sup>26</sup> Tayuwe tova-nai wagaine Yaubada giifufu Oya Sainai wagaine-deya, ani bonana babi giliuna, aku taidei tova-nai wagaine bademowa givonadabadaba, givona, “Tova seya-moena kaduwe babi gana liu-vagilena, keke babi gagana aku kaduwe gabama nodi gana liuna.”<sup>†</sup>

<sup>27</sup> Tainei vona-nai ‘tova seya-moena’ ani ananuwanuwa taidei anafaiweya. Gaitoma moyaina Yaubada gibubudi gina liudi ani gina yawelidi, e aku gavadi gavadi keke-mowa adifaiweya gina aliuliudi ani inamiya.

<sup>28</sup> E, Yaubada gaitoma moyaina gina liudi, aku yana ebaveimeya keke-mowa gina aliuliu ke gina ayaweli ani kana nuwagana.<sup>†</sup> Taidei faina kana vesivesiule-mowa, ada vesiule wagaine wa yada vemoimoina kana oduodu velemoena Yaubada wagaine ke yana nuwanuwa kana gugugaiyena. Taidei wagaine kana kivemwamwalina.

<sup>29</sup> Yada Yaubada ani Banae vaita aiyabeyabela anafaiweya.<sup>†</sup> Aiyabeyabela anafata gaitoma matatabuna ginaalai-yabudi, ada yada Yaubada gaitoma koyona moyaina gina luveyawaliye-yabudi. E ada gilubodada wa yada vemoimoina kana oduodu velemoena wagaine.

---

<sup>†</sup> **12:25** Ibel 2:1-3, 10:28-29    <sup>†</sup> **12:26** Agai 2:6    <sup>†</sup> **12:28** Dan 2:44-45    <sup>†</sup> **12:29** 2Vei 4:24

# 13

## *Tovetokiluma yana vonavagadona.*

<sup>1</sup> Aku imiyavo ani tubuiyamiyavo tovetumagana nodi wana venuwanuwakabubu,<sup>†</sup> faina moyaida Yaubada yana gabu.

<sup>2</sup> Kai kaliva keke wada alamanedi ani inaelai wagaimiya, au wana nuwanuwa faidiya ada wa yami vemwamwala wana sivaivaidi ke wana itaveyabidi yami manuweya. Taidei dewa-nai ani keke wana venuwavuluye aku wana dewadewayena.<sup>†</sup> Faina tamo tova kaliva tufodi mali kaliva isivaivaidi, ada inuwanuwa vaita adiwakawaka kaliva-mowa aku aimo nuwadi giamutuna badiyavo ani Yaubada yana aneloseyavo. <sup>3</sup> Aku badi gavega imiyamiya deliya, ani wana venuwanaunauyedi vaita imi badi nodi yogoyogomiyavo wamiyamiya.<sup>†</sup> Ada badi gavega nibaidiyavo ikiveuloulolonidi, ani wana nuwavitavaisedi vaita imi badi nodi wauloulolo.

<sup>4</sup> Nagi ani gilubodana moyaida kada vemoimoinena. Imi nagingagi ani nagi anaveimeya wana itaveyabina, e ada yegayeganimiyavo wana miyamiya Yaubada matane. Imi kaliva ke vevine, keke yami nagi wana kikivebwanene luvadiga o kai udo adinuwanuwa wagaidiya, aku wa yami nuwanuwa yegayegana wana nuwanuwa taumiyavo vavinemiyavo o kai moganemiyavo faidiya. Faina toudo ke badi gavega taudiyavo

---

<sup>†</sup> **13:1** Iyo 13:34, Lom 12:10, 1Tes 4:9, 1Pi 1:22, 2Pi 1:7, 1Iyo 3:10, 4:7,20-21    <sup>†</sup> **13:2** Mad 25:35, 1Pi 4:9    <sup>†</sup> **13:3** Mad 25:36



vovodi iawaenge-kavokavovodi, ani Yaubada gina vevonayavugidi.

<sup>5</sup> Wana itaveyabimi e ada yawaimi wagaine keke mani ananuwanuwa nuwami gina vaivai. Gavagiba bademowa wagaimiya gimiyamiya, ani wana nuwanuwayedi taidei anafaiweya, wanavona, “Taidei yaku giba-dina ani au akufaiweya.” † Faina bademowa Yaubada givona,

“Keke-mowa maita gana maduyabuyabuni.  
Keke-mowa maita gana miyasegeni.” †

<sup>6</sup> E ada taidei anafaiweya Yaubada givona faina, wa yada asevatu adafaiweya kanavona,

“KAUVEYA Banae akutoleme,  
e ada keke gana matauta.  
Gavana kaliva adifata ina gugaiye  
wagaikuya? Keke.” †

<sup>7</sup> Badi amitonagonayavo Yaubada yana vona iifufuyena wagaimiya, ani wana nuwaudududi. Ada yadi vona-dina guwadi yawaidi wagaine, ani wana itavenanaudi ke yadi vetumagana wana gaveuveulena.

<sup>8</sup> Yeisu Keliso ani keke gida vevetuli boi, malinai, ke tova gielaelai wagaidiya. Au gimiyamiya-vagata anafaiweya, keke anaebalauyabu.†

<sup>9</sup> Wana itaveyabimi ada keke wana awaegemi mali vewala tulina tulina wagaidiya, e ada

† 13:5 1Tim 3:3, 6:6-10 † 13:5 2Vei 31:6 † 13:6 Sam 118:6-7

† 13:8 Iyo 8:58

ina sibalemi wai tunutunugina wagaine-deya. Kai kana awaegeda Yaubada wagaine, aga wa yana nuwadoga aseaseda gina kivetoyogidi. Taidei wagaine yada veiwaka kana nuwagadi. Aku keke tamo lema kana nuwaga aa adiawata wagaidiyya-deya. Badi gavega taudiyavo iawaegedi ke aa tulina tulina adiveimeya ivemoimoinedi, ani keke lema ida nuwagadi.†

<sup>10</sup> Badiyavo ivevebolavoi manawa sinininila tabutabuna wagaine, ani ivetumagana vaita yadi koyona anavenuwaega ina nuwagana kevakevadinina ivevebolavoiyedi vebolavoi anadidiga wagaidiya. Aku ide Keliso kavetumaganena, ani yada vebolavoi anadidiga au kelose-nai wagaine Banae Tauna givebolavoiyena. E ada badiyavo aimo ifaifaisewa kevakeva adivebolavoi wagaidiya, keke tamo adiawaega ina nuwaga taidei yada vebolavoi anadidiga wagaine-deya.

<sup>11</sup> Veyavo anatovegugai aditonagona giwainaina kevakeva dayagidi ke gilukulukuwena Tutulagolota Tabutabu-moena wagaine koyona anavenuwaega faina, aku kevakeva-moedi ani inaunauwedi matalaviseya-deya ikabukabudi.

<sup>12</sup> Taidei faina kaduwe Yeisu gialika wa anauloulolo Yelusalema matalaviseya,† e ada Tauna dayagina yana madu wagaine ada ide kaliva yada koyona wagaine gikiveyegayeganeda ke giseliyeda Yaubada Tauna faine.†

<sup>13</sup> Taide anafaiweya Yeisu dayagina ani lakaimoena ayo veyavo anawai tuwaina faina, ide kana segena veyavo anawai tuwaina wa yana

† 13:9 Lom 14:17, 1Kol 8:8    † 13:12 Mad 21:39, Iyo 19:17,20

† 13:12 Vei 16:27

tafalolo nodi, ada au kana vetumagana-mowa Yeisu yana tafalolo gaga wagaine. Ada kai kaliva ina gadibudibusoyogeda ke ina wavida faina ide Yeisu kamulimuliyena, aga au kana atuvefaila. Banae ikivevovomumuna ke iawaveleigena aku giatuvefailedi, ada kadu anafaiweya ide wa yada asevatu vita-dina kana waiwaidi.†

14 Ide adafaiweya Banae yana vovomumu kana waiwaina, faina idedeku babiya melala-nai wagaine kamiyamiya ani keke miyamiyani-vagaina, aku melala miyamiyani-vagaina aimo ginaelai ani melala-nai kaveitabodebodena.†

15 Taidei faina Yeisu anayeganeya† tova moy-aina awadavadava anavebolavoi kana aliyena Yaubada wagaine.† Banae kavesivesiuleyena, ada yada vona awadeya iyegeyegemona ani guwana kavevebolavoiyedi.

16 Wana nuwaududuna ke wana gugai iwakana ada wana velemalesa,† faina Yaubada matane ani ina vaita yami vebolavoi Bana wagaine, ada gikivemwamwalina.†

17 Aku amitonagonayavo wana matawalewaleyedi, ada taumiyavo wanasemi yadi veimeya dibune wana miyamiya.† Badi kaliva-dina yadi faisewa ani yami awaega Yeisu wagaine iitaitaveyabina, ada ialamanena aimo yadi itaveyabina-nai ina awatalatalaina Yaubada wagaine.† Wana vemoimoinedi e ada wa yadi vemwamwala ina itaveyabimi. Aku kai yadi veimeya wana dibusoyogedi aga ina nuwavita,† e

† 13:13 1Pi 4:14 † 13:14 Ibel 11:10,16 † 13:15 Efes 5:20

† 13:15 Sam 50:14,23 † 13:16 Lom 12:13 † 13:16 Fip 4:18

† 13:17 1Tes 5:12-13 † 13:17 Isik 3:17, 34:10 † 13:17 Gug 20:31

ada gavana anaiwakana faimiya? Keke tamo.

<sup>18</sup> Aku ime faimeya wana veoveola. Ime anuwaveyalaina vaita yegayegameyavo Yaubada matane amiyamiya, ke nuwafoumeya keke tamo vita ada luto voni vaita ada koyona, ada nuwanuwama yawaima matatabuna wagaine ana dewadewa tunutunugina.

<sup>19</sup> Ika, gavonavagadonemi, nuwanuwaku lakaina wana veoveola toyogina faikuya e ada Yaubada gina maduimiliku ganaelai wagaimiya.

### *Vona anaebalaulyabu.*

<sup>20-21</sup> Aku Iya gaveoveola faimiya taidei anafaiweya. Yaubada Banae nuwaniwalova giveleveleda,† ani gina faifaisewa nuwainagemiya e ada amifaiweya yana nuwanuwa wana gugaiyedi.† Yada Kauveya Yeisu Keliso yana alika wagaine, dayagina gimadu. Ada dayagina-nai wagaine, Yaubada yana veyavo anawai evaguna miyamiyani-vagaina gikiveyegemonina. Ada muliya gisiveyawa-vagilena alika wagaine-deya. Ada gaveoveola Yaubada gina kidewedewemi yami dewa moyaina wagaidiya, gavana gina kivemwamwalina anafaiweya. Tainei matatabuna anafata gina yegemona Yeisu Keliso faina, Banae ide yana sifiyavo ada Toitaveyabina lakaina,† e ada Banae anayegana kana kikelakaina tova matatabuna keke anaebalaulyabu. Ika anafaiweya.

---

† 13:20-21 1Tes 5:23 † 13:20-21 Fip 2:13, 1Pi 5:10 † 13:20-21 Iyo 10:11

<sup>22</sup> Tubuiyakuweyavo, gaveolemi ke yaku vona asevatu wana venogaledi. Taidei yami leta gavetokilumina ani keke manamanawena.

<sup>23</sup> Nuwanuwaku wana alamanena vaita tubuiyada Timoti bademowa deliya ietoyavuna, ada kai gina maduelai aga Iya nodi anaela ana madubodami.

<sup>24</sup> Amitonagonayavo wana vonedi yaku nuwakabubu, ada kaduwe anafaiweya Yaubada yana kaliva tabutabudiyavo moyaidi wagaidiya. Kaduwe tubuiyadeyavo fafali Itali wagaine-deya ani yadi nuwakabubu wagaimiya.

<sup>25</sup> Yaubada wa yana nuwadoga moyaimi gina lemelememi.

**Yaubada Yana Veyavo Anawai Evaguna**  
**The New Testament in the Bwaidoka language of**  
**Papua New Guinea**  
**Nupela Testamen long tok ples Bwaidoka long Niugini**  
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

---

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2